

陳州府志卷之十八

楚鄂崔應階吉升氏纂修

太康縣人物

下

唐袁朗父樞仕陳爲尚書左僕射朗在陳爲祕書郎江
總尤器之後主聞其才詔爲明賦灑然無留思後主
曰謝莊不得獨美於前矣復詔爲芝草嘉蓮二頌歎
賞尤厚累遷太子洗馬德教殿學士陳亡入隋歷尚
書儀曹郎武德初隱太子與秦王齊王相傾爭致名
臣以自助朗時爲齊王文學從父弟承序亦有名王
召爲文學館學士朗累封汝南縣男再轉給事中卒

太宗爲廢朝一日謂高士廉曰朗任淺而性謹厚使
人悼惜期遠祖滂爲漢司徒自滂至朗凡十二世其
間位司徒司空者四世淑顯察皆死宋難昂著節齊
梁時期自以中外人物爲海內冠雖琅邪王氏踵爲
公卿特以累朝佐命有功鄙不爲在朗孫誼神功中
爲蘇州刺史承序爲齊王元吉府學士府廢補建昌
令治尚慈簡吏民懷德高宗爲晉王太宗崇選僚屬
問梁陳名臣子弟誰可者岑文本曰昔陳亡百司奔
散有袁憲者朝服立後主滂白刃不避也王世充篡
隋羣臣表勸進而憲子給事中承家稱疾不肯署令

其少子承序風操清亮無愧先烈帝乃詔拜晉王兼侍讀加宏文館學士卒朗從祖弟利貞陳中書令敬孫高宗時爲太常博士周王侍讀及王立爲太子百官上禮帝欲大會羣臣命婦各宴宣政殿設九部伎散樂利貞上疏諫以爲前殿路門非命婦宴會倡優進御之所請徙命婦別殿九部伎從左右門入罷散樂不進帝納之旣會帝傳詔利貞曰卿奕葉忠鯁

能抗疏規朕之失不厚賜無以勸能者乃賜物百段

擢祠部員外郎卒追贈祕書少監

唐書文藝傳

劉元佐滑州匡城人少倜儻不自業爲縣捕盜犯法吏

笞辱幾死乃亡命從永平軍稍爲牙將大歷中李靈
耀據汴州反元佐乘其無備襲取宋州有詔以州遂
隸其軍節度使李勉卽表署刺史德宗建中初進兼
御史中丞充宋亳穎節度使時李納叛李洧以徐州
歸納急攻之詔元佐援洧大破納兵斬首萬餘級東
南饒漕乃通進圍濮州徇濮陽皆下再降其守將遂
通濮陽津遷檢校兵部尚書兼曹濮觀察淄青兗鄆
招討使汴滑都統副使李希烈反元佐與李勉等聯
兵屯淮汝數困賊帝在奉天垂意關東乃詔檢校尚
書左僕射同中書門下平章事希烈攻陳州元佐數

之希烈走遂進取汴州詔加汴宋節度使陳州諸軍
行營都統元佐本名洽至是賜名以尊寵之入朝復
兼涇原四鎮北廷兵馬副元帥檢校司徒性豪縱輕
財好厚賞故下益用汴自李忠臣以來士卒驕不能
自還至元佐彌甚其後殺帥長大鈔劫徂于利而然
也元佐貴母尙在賢嬪人也常月織絁一端示不忘
本數教敕元佐盡臣節或傳寺中佛軀汗流元佐自
往大施金帛於是將吏商賈奔走輸金錢恐後十日
元佐敕止籍所入得巨萬因以贍軍其權譎類若此
初李納遣使至汴元佐得其陰謀故納最憚之卒年

五十八贈太傅諡曰壯武

唐書藩鎮傳

韓宏滑州匡城人少孤依其舅劉元佐舉明經不中從外家學騎射由諸曹試大理評事爲宋州南城將事劉全諒署都知兵馬使貞元十五年全諒死軍中思元佐以宏才武共立爲留後請監軍表諸朝詔檢校工部尙書充宣武節度副大使知節度事先是曲環死吳少誠與全諒謀襲陳許使數輩仍在館宏始得帥欲以忠自表於衆卽驅出少誠使斬之選卒三千會諸軍擊少誠敗之汴自劉士寧以來軍益驕及殺陸長源主帥勢輕不可制宏察軍中素恣橫者劉諤

等三百人一日數其罪斬之牙門流血丹道宏言笑自如自是訖宏去無一敢肆者李師古屯曹州以謀鄭滑或告師古治道矣兵且至請備之宏曰師來不除道也師古情得乃引去累授檢校司空同中書門下平章事宏以官與太原王鐔等詒書宰相恥爲鐔下憲宗方用兵淮西藉其重更授檢校司徒班鐔上嚴綬以王師敗乃拜宏淮西諸軍行營都統使扞兩河而令李光顏烏重允擊賊宏不親屯遣子公武領兵三千屬光顏然陰爲逗撓計每諸將告捷輒累日不怡元濟平以功加兼侍中封許國公李師道誅宏

大懼因請入朝册拜司徒中書令以足疾命中人掖拜固願留京師帝崩攝冢宰俄出爲河中節度使以病請還復拜司徒中書令卒年五十八贈太尉諡曰隱宏爲人莊重寡言罪殺人問法何如不自爲輕重沈謀勇斷故少誠師道等皆憚之詔使至或驚侮不爲禮齊蔡平勢屈而後請覲然天子尊寵異等能以名位始終亦其天幸子公武字從僊起家衛尉主簿爲宣武行營兵馬使以討蔡功檢校左散騎常侍鄜坊等州節度使宏入朝爲右金吾將軍宏出河中宏弟充徙宣武乃曰二父居重鎮我以孺子又當執金

吾職乎因固辭改右驍衛大將軍性恭遜不以富貴自處卒贈戶部尚書諡曰恭

充本名璿少亦依舅家李元爲河陽節度使署牙將元改昭義又從之元嘗謂賓佐曰充後當貴諸君必善事之未幾宏領宣武召主親兵元曰我知君舊矣吾兒不才無足累君者二女方幼以爲託遂辭去累授御史大夫宏峻法人人不自保充謙慎無少懈念宏在鎮久不入見天子身又得士不自安因請入宿衛宏許之不卽遣後因獵單騎走洛陽朝廷亮其節擢右金吾衛將軍轉大將軍斥軍士虛名不如令者此

百人歷少府監鄆坊等州節度使穆宗立幽鎮魏復
亂王承元以冀兵二千屯滑州朝廷恐冀兵相誅爲
叛徙承元鄆坊而授充檢校尚書左僕射爲義成軍
節度使會汴軍逐李愿以李芥主留事帝謂充素爲
汴士悅向詔節度宣武兼統義成兵討芥戰郭橋破
之會李質斬芥遂入汴初陳許李光顏亦奉詔討芥
屯尉氏意先得汴欲俘掠以餌軍而汴監軍姚文壽
亦欲納光顏充聞其謀馳至城下汴人望見充歡躍
無復貳者始帝遣人問破賊期充對汴天下咽喉臣
頗習其人然王師臨之一月可破方二旬卽克帝喜

曰充料敵若神加檢校司空籍券所脅爲兵者三萬
悉縱之又責首亂者千餘斤出境令曰敢後者斬由
是內外安堵汴人愛賴之卒年五十五贈司徒諡曰
肅充雖將家性儉節歷三鎮居處服玩如儒先生乘
機決策無餘悔世推善將李元沒充爲嫁二女周其

家

唐書本傳 按劉元佐韓宏史皆稱滑州匡城人然韓文公作宏神道碑謂其先自潁川徙陽夏爲

陳之太康太康之韓其稱蓋久自公始大著又謂宏父海娶鄉邑劉氏女夫人之兄曰司徒元佐文公宏

同時人碑文自得

其實宜載康志也

宋沈倫初名義倫以諱省字順儀太康人少習三禮於

嵩洛間講學自給漢乾祐中白文珂鎮陝往依之與

宣徽使胥居潤善薦辟宋太祖同州幕府繼署滑許
宋三鎮從事掌留後財貨以介聞太祖受禪召爲戶
部郎中奉使吳越歸奏便宜屬揚泗間饑長史言郡
中軍儲尚百餘萬皆陳腐儻以貸貧民至秋收新廩
公私俱利朝論難之太祖以問倫對曰國家以至恩
溥民自當感召和氣豈復慮意外耶上遽命發廩貸
民建隆三年遷給事中明年爲陝西轉運使王師伐
蜀改隨軍水陸運使諸將入成都競取玉帛子女倫
獨寓僧舍潔躬糲食有獻珍異者峻拒之東歸纔圖
書數卷充篋而已上知之擢爲戶部侍郎樞密副使

親征太原領大內都部署權留司三司事開寶六年
拜中書侍郎平章事集賢殿大學士兼提舉荆南劍
南水陸發運事雩祀西洛以倫爲東京留守兼大內
都部署俄召赴行在令預大禮太宗初加右僕射兼
門下侍郎有事太原復留守判開封府事師還論功
加左僕射五年監修太祖實錄成賜襲衣金帶六年
加開府儀同三司以疾請告明年坐與盧多遜同列
不能覺察責降工部尚書落子繼宗職未幾致仕上
念倫舊臣命復繼宗官以慰其心薨年七十九贈侍
中諡恭惠繼宗字世卿蔭蒲西頭供奉官加朝散大

夫知浚儀縣轉屯田郎中至道末領淮南轉運有疾以將作監致仕東封起歷太僕光祿二少卿判三司勾院卒年五十六女爲眞宗貴妃三子惟溫至祕書丞惟清內殿承制惟恭將作監簿

宋史本傳

〔元〕韓克昌椿之子太康人以孝廉辟歷河南陝西二憲司椽尋進刑部臺省持正不撓擢刑部主事有兄弟五人爲盜法當死克昌曰弟從兄者也此不幾于族乎乃議宥最幼弟上可其言拜爲監察御史卒于官

韓元善字大雅克昌之子由國子監生授濟州判官歷行御史臺椽除江南湖北道廉訪司知事召爲戶部

主事遷吏部郎乞罷置義莊贍宗族立義學教子弟
後以河南左右司郎中進戶部侍郎擢吏部尚書叅
議中書省事追封梁國公

明王鈍字士魯太康人元末猗氏縣尹洪武中徵授禮
部主事歷官福建參政以廉慎聞遣諭麓川却其贈
或曰不受恐遠人疑貳鈍乃受之還至雲南輸之官
庫二十三年遷浙江左布政使在浙十年名與張紈
埒帝嘗稱於朝以勸庶僚建文初拜戶部尚書成祖
入踰城走爲邏卒所執詔仍故官未幾與紈俱罷尋
命同工部尚書嚴震直等分巡山西河南陝西山東

又同新昌伯唐雲經理北平屯種承制再上疏言事
皆允行永樂二年四月賜敕以布政使致仕既歸鬱
鬱死子淪永樂四年進士仁宗時遷鄭王府左長史
數以禮諫王嘗擬荀卿成相篇撰十二章以獻語切
與王不合召改戶部郎中英宗卽位擢戶部右侍郎
巡撫浙江有惠政母喪起復入覲留攝部事尋以老

乞歸卒

明史本傳

郭曾字師魯元末以春秋中河南鄉試授湖廣黃陂縣
教諭兵亂謝病歸隱明初經薦授磨勘司令從潁川
侯傅友德征西有功陞御史臺治書卒於官後以逆

黨構連逮家屬妻王氏捧遺像愬高皇一見曰此郭
曾從傅友德征西有功者着馳驛寧家

傅安字志道洪武末由縣吏授禮科給事中奉使西番
羈留十有三年備歷艱苦執節不屈卒致西番款服
永樂中始還陞兵科右給事調禮科都給事中賜一
品服以老病致仕著有使遠傳

韓鐸字宜伯明於世務沉毅有幹濟識大體草創之日
多所建明瀟歷省垣官至戶部侍郎一代之良也

顧佐字禮卿太康人建文二年進士除莊浪知縣端陽
日守將集官僚校射以佐文士難之持弓矢一發而

中守將大服永樂初入爲御史七年成祖在北京命吏部選御史之才者赴行在佐預焉奉命招慶遠蠻

督採木四川從北征巡視關隘遷江西按察副使召

爲應天尹剛直不撓吏民畏服人比之包孝肅北京

建改尹順天權貴人多不便之出爲貴州按察使洪

熙元年召爲通政使宣德三年都御史劉觀以貪被

黜大學士楊士奇楊榮薦佐公廉有威歷官並著風

采爲京尹政清弊革帝喜立擢右都御史賜赦獎勉

命察諸御史不稱者黜之御史有缺舉送吏部補選

佐視事卽奏黜廢臆楊居正等二十人謫遼東各衛

爲吏降八人罷三人而舉進士鄧棨國子生程富謁
選知縣孔文英教官方瑞等四十餘人堪任御史帝
使歷政三月而後任之居正等六人辨愬帝怒并諸
爲吏者悉戍之旣而瞻自戍所潛還京脅他賄爲佐
所奏且言瞻謀害已詔戮瞻於市帝北巡命偕尚書
張本等居守還復賜敕令約束諸御史於是糾黜貪
縱朝綱肅然居歲餘或告佐不理冤訴帝曰此必重
囚教之命法司會鞫果千戶臧清殺無罪三人當死
使人誣佐帝曰不誅清則佐法不行磔清於市八年
秋佐有疾乞歸不許以南京右都御史熊概代理其

事踰年而概卒佐疾良已入見帝慰勞之令免朝賀
視事如故正統初考察御史不稱者十五人降黜之
邵宗九載滿吏部已考稱亦與焉宗奏辨尚書郭璉
亦言宗不應與在任者同考帝遂責佐而御史張鵬
等復劾宗微過帝以鵬朋欺并切責佐佐上章致仕
去十一年九月卒佐孝友操履清白性嚴毅每旦趨
朝小憩外廬立雙藤戶外百僚過者皆折旋避之入
內直廬獨處小爽室非議政不與諸司羣坐人稱爲
顧獨坐云然持法深論者以爲病

明史本傳 縣志
佐卒賜祭葬萬曆

三年郎撫王世貞奏請贈
少保諡端肅立祠春秋祭

張忠字友直沉潛簡易不爲阿隨授陝西嵐縣知縣當西南貢道往來旁午民不能堪忠調停處置人稍休息軍豪侵民田大爲裁正親藩奪地稅猶在民奏請除稅蒞任六年以憂去民赴闕奏留上命服滿復任歷九載巡按御史奏留又九載赴京考滿性不能事當路陞衡州府通判調鎮江尋致仕

郭濟字澤民曾之孫中永樂戊子鄉試第一授定州訓導復補開州陞左春坊司諫轉梁府紀善改行入陞鎮江知府奉勅行事遇旱禱雨輒應屬有虎患爲檄告神虎自沉於河民繪異政考最二次將九年病卒

於官

郭緒字繼業成化辛丑進士授戶部主事監淮安倉署
郎中奉勅督理宣府糧儲不受請託實授郎中陞雲
南左叅議撫諭有功六年考滿陞四川右叅政雲南
撫按奏撫諭功畧詔加俸一級進階嘉議大夫致仕
王節字仲禮九歲能文邑令崔敬大奇之妻以孫女中
順天壬午鄉試授陝西盤屋知縣卽崔公鄰邑外兄
弟相見甚懽慈祥愛民時稱良吏三年卒於官吏民
思之祀名宦以孫埏貴贈右副都御史

安康字道

靈體親魁梧清介有守入太學中順天鄉試

時詔吏部選堪風憲者康與選當奏聞疾不能赴疾愈謁選冢宰惜之授陝西徽州知州力行教化多惠政卒於官子吉推官孫安仁進士任永年知縣沉毅明察人不敢欺三世皆有顯績

劉慶字元善任廣平府訓導調西安府有軍武姓者以父老當代慶語主帥曰此子器識必大用宜愛惜以成其才主帥從之其人後至叅議邊士嚮風九年陞密雲教諭肅府左長史致仕子湜中進士兩爲縣令以循良名陞南京戶部員外剔宿蠹人咸服其能未幾卒父子皆有才名

王照字景陽中景泰癸酉鄉試任襄陽府同知廉介性
成俸外無一毫染在郡九年宦橐惟敝衣數事而已
陞福建都轉運同知嘆曰錢穀之數我何浼爲不之
任

師存智字汝愚聰察有幹才令桐城以能稱拜御史大
著聲望總兵張洪征遼爲監軍有金帛之賜巡兩浙
鹽按陝西風裁凜然劉瑾下員外韓邦靖獄力救得
不死闔人橫行獨畏師御史平生無苟交妄取卒於
京不能殮信陽絢中書買棺殮以歸

王杰字景用厚重博學篤於孝友兄庶乙卯舉人早天

杰撫猶子盡慈愛如縉雲縣雲巖邑當孔道一以平
賜誠懇應之繪病瘡乞休士民追送數百里歸則明
農課子弟有司舉鄉飲子旋貢士旋成進士至副都
御史贈如其官

韓瑀字廷玉以明經任工部主事有才幹時營建北京
多所經營中貴人紛競掎剋瑀中立其間無怨無德
人服其調劑之能

王朝賢字立之嘉靖壬辰進士和厚質實言不出口初
授大理評事遷寺正務以謹飭自持出知順德府委
政同官而考其成郡人稱曰王佛歷陝西副使擢太

僕卿出爲湖廣叅政醇謹而已不失爲長厚君子

師宗魯字秉哲由舉人任順天府定興知縣性醇謹事繼母孝姪幼孤撫養甚至仕於外姪廢舊業強半無所問析產聽其自取家僮竊首飾敗露戒勿認爲脫其罪人雖竊笑而存心則寬厚矣恂恂然與物無忤貧賤親舊一體相待人皆多之

何維字承之美丰姿善談論矍然有守授山東冠縣知縣廉明仁察時有莘縣城隍冠縣何郎之頌蓋莘縣城隍靈顯異常故以相比擢南京戶部主事權揚州稅以清介著遷貴州思南知府執法不撓人多忌之

遂有中傷公論甚惜焉

張涵字用敬爲諸生時富人某餽以數金堅不受強之不已乃受曰後必以報任潛山訓導歸其人已死莫於墓舉金還其子曰爾翁厚意今已報也人以爲不負死者云遷臨縣教諭子正蒙歲貢生孫崇德舉人修德甲辰進士自有傳

張文通字道亨性孝友弟雖異爨不分彼此嘗逋賦於邑代完之弟不知也數月見其不督乃知之親黨有當周者傾囊倒篋不顧也位在下寮力所得爲無有弗竭素位而行人皆稱之

賈珣字同玉博學篤行孝友備至父早世無厚產母拮据諸弟俱幼自刻苦以事其母久困諸生中讀書不急以明經任鄒縣教諭身教率先士多譽髦焉

王垞字曰振資敏達文學冠一時師尚詔反邑無令立闔闔呼壯士理守禦有奸人謀內應畏垞不得發蕭同知馳至城守已備賊圍三日不能被乃解去

王朝獻字寵之以明經任遼海衛經歷雖居下位必行其志善雪枉抑人稱仁明受命權稅有不如額者曰此誤耳非匿也釋之中貴人由河而上大擾人皆畏避朝獻迎諸河從容與言無所索而去攝朝城篆瑩

然無所累人稱其廉

姬自修字子治曠達不拘小節知沙河縣邑衝疲調停有方大得民心嘗以修署銀市穀賑飢出俸代民完租部使者三薦其才有中傷之者罷歸

徐舜耕字孝卿性豁達文學行誼有聲於時在宗族最長拊循卑幼因才教育得敦睦之道任縣主簿勤懇周慎務盡其職歿繼室方自盡以殉詔旌其門

石守燧字異齋以明經任滁縣訓導遷河間教諭端偉有度性簡澹恥爲世趨問道者屢滿姬可介幼失怙撫如已子長教誨成名家皆願豐命四子與介均析

無二視蓋亦人所難者

王汝訓字廷言沉靜端恪平生無非僻之舉任山東章邱縣知縣清慎御下吏畏民懷惜年不永未竟其志而歿

王垓字曰衡隆慶戊辰進士雄才偉度負匡濟畧爲給諫嶽立不阿累擢都御史撫甘肅屯科徵輸有策邊方戴之再巡撫陝西會陝告歉垓借漕糧分貯孟津由舟接濟山陝河南全活數萬又請延慶二郡開墾荒田爲軍民永利致政家居好吟咏多修建邑治巽

隅取文峰造浮屠十三級創書院延師教親族子弟

年八十三終賜祭葬恩廕

郭顯忠字同竹萬歷丁丑進士知桃源縣有異政紀治
河功欽賞丁艱起陝西三原考前任績擢工科給事
中侍經筵以論事忤內璫出爲漢中知府刑清政簡
民頌其德遷分廵靖北道改湖北又改朔州以封事
賜一品服色加山西布政考滿贈三代建坊敘邊功
陞南京太僕寺卿乞休疏五上准致政長於詩有雲
中吟楚遊草等集林下著效顰小草紀年譜崇禎元
年卒賜祭葬

秦尚明字若湛萬歷己丑進士天性剛決落落難屈知

蕭山宜興兩縣金矢屏絕擢戶部主事痛陳利害釐剔積弊遷陝西叅政邊庭事績皆上關國計下利民生清勁之操始終如一

杜文煥字明華萬歷丁未進士司計部持籌有方出守池州寧國二郡稱廉明陞關中大叅壬戌賚表入賀時權璫用事上言宜親賢遠奸痛擊時事不報丁艱歸乙丑中旨數起煥曰美官易得惡名難追卒不就生平清廉持重不詭不隨其卓識沉毅有過人者

張修德字鳳芝萬歷甲辰進士數齡授書穎悟非常日誦數千言初授南樂知縣具心實政吏民懷畏鄰封

疑獄咸取決焉以憂去職後補甯津甯津爲瀛海巖
壤有露乃稱王者修德以計擒之餘孽解散擢廣東

道御史慷慨陳時事奸人側目出使蜀藩歸卒上愍

之命諭祭入鄉賢祠

按明史載修德劾熊廷弼破壞遼陽後廷弼復起御史張秉謙

追論排擠廷弼輩詔貶修德等三秩縣治稱修德慷慨陳事奸人側目恐非信史故附記於此

曾省信字抱一萬歷己未進士酣於古學讀書有靜悟

厭辭華言笑不苟崇禎癸酉禮曹奉旨正文體以其

經墨爲中州鄉場楷模所著有芝香居詩忠孝文集

刪正大全傳世卒贈戶部主事

郭世忠字懃韓萬歷甲午舉人幼受易於兄太僕顯忠

聰悟罕有其儔初授廣平府通判駐臨洛關關扼京師通衢應接煩費世忠處以暇豫民不苦役轉泰安知州東嶽其屬境也每歲謁廟不下數十萬人互相競擾世忠嚴行禁止立定格條民不敢犯會中貴謀祀東封以共給不備觸其怒遂解組歸

王瑞麟字咸有萬歷戊午鄉薦沈博六籍尤精於書邑蠹崔姓受鄰驛金移派陽夏歲協八千金有奇里下驚擾麟率邑人白其事補林慮教諭臨晉知縣遷灤州知州多惠政卒於官

王榮寵字拙翁少而穎異試數冠軍入棘闈十四次竟

不第庚辰授雒川知縣雒川告饑經畧孫傅庭檄豆
草殺戶吏傳首雒川寵抗顏請命民得息肩雒東南
接白水寇蜂午鄜州兵使議盡殲之民驚匿山谷中
乃爲文止兵親行綏勸所全無算調安邑循行阡陌
減荒糧二萬餘不殊雒川政教云

張鑠字右文陳州籍太康人廩膳生員有經濟才崇禎
十七年二月以內閣范景文薦懷宗召對中左門言
三策首請太子監國南京擇耆臣爲輔次陳搬運通
粟次陳守城要畧又條議十八款上命留覽召吏部
以御史擬用旋因時勢孔亟都門戒嚴奉兵部咨文

陝州府志 卷之十八
招練曹濮等處義勇入衛及途聞京師陷北向伏地
痛哭南渡河馳赴漕督史可法欲共圖興復可法卒
乃歸里數椽茅屋自耕而食因號食牛先生云

郭清字宇泰甲午舉人明斷有經濟才明末疏請兩臺
築堡清野議雖不行後果亂人服其識

國朝楊遠字三山順治元年恩貢授山西大同通判駐朔
州姜壤叛州皆附賊偽檄至士民鬪於庭者數千欲
擁之迎賊執義不從爲賊斃殺事聞贈按察司僉事
賜祭廕弟邊知縣

李善感字孕秀少博學善詩辭久困諸生年垂暮始

闡聯捷初授平山知縣聞學諭王君喪久羈不歸乃
資送之且致贈爲營葬計調醴陵未任卒所著有四
書要旨繼述堂詩藏於家

王輔運字林州丁亥進士初授內閣中書舍人奏罷屯
官等四款遷刑部四川司主事定律令清疑讞差理
直隸獄犯奏免秋刑以才品調禮部祠祭擢本部員
外郎中議祀典除張浚進于謙從祀時論躉之轉湖
廣上荆南道荊州屬雲南衝要每歲大兵換班供應
煩難運獨任其勞官民不擾康熙元年進勦西山殘
寇圖穆傅三大將軍統禁旅及川陝河南官兵凡十

二萬運職任督運單騎屢入賊穴日夜催辦糧餉相
繼兵食以足二年奏捷三年入 覲四年復任改湖
廣提學道卒於官

許重華字松牖順治壬辰進士初授山陽知縣有誣命

疑獄歷年不決一見卽得其狀再補懷集殘逆龐國

振擁衆屠掠身先士卒衝險追之賊盡歸誠遷冀州

知州每盜賊竊發不旋踵逮者已至稱神君焉擢臨

洮知府地界邊陲人不知書乃修椒山書院置十三

經通鑑等書簡俊秀講肄其中糧多積欠屬令坐繫

者七八白上憲活覈設法抵補一時報完擢溫處副

使時海禁嚴民多失業癸丑入覲

上御便殿召朝覲官詢民疾苦華疏陳七事首以開界爲
請開海二百里民皆懽躍舊有海防兵三千占民居
因檄所屬修營房數百間兵民兩便又蠲荒賦減徵
派補缺徭溫民肖像祀之家居謙退如布衣著有書
紳集公餘草藏於家

張覓龍字羽京壬辰進士除括蒼司李括在浙萬山中
民多逋負惻然曰荒不蠲則賦不給舊欠未清新稅
重困莫若蠲荒徵熟乃籲督撫奏上得請括多疑獄
辨其枉者釋之觀察使駁再四龍持益堅曰吾爲朝

四庫全書 卷之十一
三
廷全無辜非與觀察爭意見也何盛氣相加爲自是
入憚其風旨當事上卓異以爲廉明第一會司李缺
裁補乘州知州多巨猾煽民逋稅積八萬有奇設法
招致民無逋負丁艱歸服闋補靜海水陸交衝民苦
牧馬厲禁遏之邊人不敢南牧俸滿擢祠祭司主事
蒞事未幾卽告歸歲庚申康大霑雨民不聊生力號
當塗免歲輸半邑人感德爲立碑誌

魏觀 字元賡以歲貢選授曲陽通判管轄倒馬固關
龍泉三關事務鼎革之初地方甫定姜壤煽亂關外
皆賊穴羣懷疑貳颺勅所轄嚴守備擒奸細百餘人

黠者誅之餘皆結以恩義人心始定擢泉州府同知
署惠安縣事撫按腺清丈地畝百姓驚歷颺條悉利
害力請停止省加派萬金惠安民爲立生祠丁艱起
復補鎮江通判海賊入寇雉堞不完守令恐甚颺諭
紳民分堞修整一日夜器具咸備寇至賴以無恐以
疾告歸不復起親友或勸之出笑不答及海寇再犯
京口失守人始服其先見云

石太品字萬有性至孝年十五博通經史試輒冠軍順
治戊子拔貢授金谿知縣革除火耗令百姓自封投
櫃屏一切交遊重修學宮朱陸祠歷任五載因母病

告歸囊中惟圖書數卷而已林下三十年引掖後學
戶外屨滿安貧樂道手不釋卷一時著作咸推之

耿帝德字亦夔明季隨父於彝避難河朔年十歲父病

不食亦不食主人異之謂爾童子何自苦曰父不食

我能下咽乎十八食餼於庠聞孫徵君講學蘇門負

笈往從三十薦於鄉與睢陽湯孔伯嵩陽耿逸菴友

善同以理學知名念父春秋高無意公車家居雖盛

暑必衣冠端坐從遊甚衆初授商城教諭同考湖廣

還立學規培士習有蘇湖師範丁艱歸哀毀如禮不

飲酒茹葷入內者三年服闋補永城復入簾奉檄代

縣捕蝗炎天烈日旬餘不少息別境受災永永卒無恙闔邑送萬民衣卻曰我寒氊一席無庸此歿之日囊無餘貲所著有學規八則日知錄慎思錄孝經序解行世

柳正芳初任澠池教諭報最歷知兩縣擢雲南澂江知府興利除弊政績皆有可紀家居恬退樂善好施卒年七十五著有就正集

許維欽廣東樂昌知縣有善政辨誣枉興學校殲翁源大坑山寇韶州鎮兵譁於營倚山結陣欽單騎諭之帖然歸伍所著有瀧集視齋稿藏之家

王鑰歲貢生性孝友初考授國子監學正遷工部司務
白堂官捐舊稅絕火耗遷刑部主事轉員外郎察獄
周詳多所平反陞戶部江南司郎中除高郵埭江田
七百餘頃民無賠累以疾歸

扶溝縣人物

漢郭禧其所建樹世遠莫考縣志以爲異代名臣故首

及之今從其舊

按後漢書太尉郭禧係潁川陽翟人
自曾祖宏從祖躬躬子廷從父鎮鎮

子賀禎及禧子鴻俱明習法律爲名臣此公一人廷
尉七人侯三人刺史二千石以下甚衆亦非世遠莫

考者扶志所載或姓名偶同歟然省志稱
郭鎮郭禧俱扶溝人不知所本姑附於此

元馮夢周字士可仕新昌知州居家嘗築樓藏書千餘

卷資里人乏書者約曰假書者籍其姓名書目讀竟歸原書而銷其籍損者不責償不歸者置不問缺逸者補緝以俟著積善篇列戒十四皆儆世要語

明焦永固洪武癸酉舉人初授工部員外督大工稱旨改山西道御史數直諫悉見嘉納彈劾不職者甚衆以疾乞致仕家居課子繼登鄉薦

羅俊登永樂庚子賢書授大同府通判武宗幸大同護車駕有功擢漢中知府居官釐奸剔弊一塵不染鄉人比以王彥方云

楊鼎字廷器永樂辛丑進士授庶吉士改兵科給事中

陞都科數賜清燕造膝多披瀝語百僚敬憚之出爲
山東叅政民苦旱荒疏請括郡縣貯庫餘銀買粟十
萬賑之朔雲邊儲告匱奏移平陽粟十萬餘往濟鹽
書慰勞遷左布政致仕

高鵬以諸生辟功曹有雋才獲上考授蘇州府推官決
獄明允案無留牘郡中賦重多逋負檄鵬兼催科督
運京師九載滿代歸百姓泣留載道

張凱登景泰庚午賢書伯仲相繼扶有同胞三鳳坊爲
諸生捐資倡修學宮人多義之仕曲沃知縣擢南康
通判延安同知皆有政聲當道交章薦之以病致仕

歸

嚴憲字廷章景泰辛未進士授戶部主事歷員外郎中
督餉四川以廉明著陞陝西叅議剛直峻厲人不敢
干以私晉憲副備兵固原從征石城滿四有功獲金
幣獎歸林下結耆英八老社優游暢飲三十餘年壽
八十四卒

羅贊字世卿成化壬辰進士初授新昌知縣除奸黨平
亂畧赫然有聲徵拜山西道監察御史巡按陝西賊
吏多解綬去西南夷畏威遠遁疏中興八事悉見嘉
納再按山東益厲風裁豪貴斂手未竣事構疾會子

玆舉河南第一卽請告歸

李夢陽字獻吉慶陽人父正官周王府教授徙居開封

母夢日墮懷而生故名夢陽弘治六年舉陝西鄉試

第一明年成進士授戶部主事遷郎中權關格勢要

搆下獄得釋十八年應詔上書陳二病三害六漸凡

五千餘言極論得失末言壽寧侯張鶴齡招納無賴

罔利賊民勢如翼虎鶴齡奏辨摘疏中陛下原張氏

語誣夢陽訕母后爲張氏罪當斬時皇后有寵后母

金夫人泣懇帝帝不得已繫夢陽錦衣獄尋宥出奪

俸金夫人懇不已帝弗聽召鶴齡閉處切責之鶴齡

免冠叩頭乃已左右知帝護夢陽請毋重罪而子綾以洩金夫人憤帝又弗許謂尚書劉大夏曰若輩欲以杖斃夢陽耳吾寧殺直臣快左右心乎他日夢陽途遇壽寧侯晉之擊以馬箠墮二齒壽寧侯不敢校也孝宗崩武宗立劉瑾等八虎用事尚書韓文與其僚語及而泣夢陽進曰公大臣何泣也文曰奈何曰比言官劾羣奄閣臣持其章甚力公誠率諸大臣伏闕爭閣臣必應之去若輩易耳文曰善屬夢陽屬草會語洩文等皆逐去瑾深憾之矯旨謫山西布政司經歷勒致仕旣而瑾復據他事下夢陽獄將殺之康

海爲說瑾乃免瑾誅起故官遷江西提學副使命甲副使屬總督夢陽與相抗總督陳金惡之監司五日會揖巡按御史夢陽又不往揖且敕諸生毋謁上官卽謁長揖毋跪御史江萬實亦惡夢陽淮王府校與諸生爭夢陽笞校王怒奏之下御史按治夢陽恐萬實右王訐萬實詔下總督金行勘金檄布政使鄭岳勘之夢陽僞撰萬實劾金疏以激怒金并構岳子法通賄事寧王宸濠者浮慕夢陽嘗請撰陽春書院記又惡岳乃助夢陽劾岳萬實復奏夢陽短及僞爲奏章事參政吳廷舉亦與夢陽有隙上疏論其侵官不

俟命徑去詔遣大理卿燕忠往鞠召夢陽羈廣信獄
諸生萬餘爲訟寃不聽劾夢陽陵轍同列挾制上官
遂以冠帶閒住去亦褫岳職謫戍法奪廷舉俸夢陽
既家居益斲弛負氣治園池招賓客日縱俠少射獵
繁臺晉邱閒白號空同子名震海內宸濠反誅御史
周宣劾夢陽黨逆被逮大學士楊廷和尙書林俊力
救之坐前作書院記削籍頃之卒子枝進士夢陽才
思雄鷲卓然以復古自命弘治時宰相李東陽主文
柄天下翕然宗之夢陽獨譏其萎弱倡言文必秦漢
詩必盛唐非是者弗道與何景明徐禎卿邊貢朱應

登鳳璘陳沂鄭善夫康海王九思等號十才子又與
景明禎卿貢海九思王廷相號七才子皆卑視一世
而夢陽尤甚吳人黃省曾越人周祚千里致書願爲
弟子迨嘉靖朝李攀龍王世貞出復奉以爲宗天下
推李何王李爲四大家無不爭效其體華州王維禎
以爲七言律自杜甫以後善用頓挫倒插之法惟夢
陽一人而後有譏夢陽詩文者則謂其模擬剽竊得
史遷少陵之似而失其真云康海字德涵武功人弘
治十五年殿試第一授修撰與夢陽輩相倡和訾議
諸先達忌者頗衆正德初劉瑾亂政以海同鄉慕其

才欲招致之海不肯往會夢陽下獄書片紙招海曰

對山救我對山者海別號也海乃謁瑾瑾大喜爲倒

屣迎海因設詭辭說之瑾意解明日釋夢陽踰年瑾

敗海坐黨落職

明史文苑傳

縣志稱夢陽祖居扶

慶陽史稱其徙開封扶時隸開封是已返舊居後其子及孫曾科第不絕於扶故取明史本傳列焉

羅玘字孟玉侍御贊之子弘治丙午解元己未成進士

授兗州府推官平刑賑饑聲實大著擢監察御史清

戎畿內出知鳳陽府忤璫爲所構調嘉興再調延安

陞固原兵備副使劾元戎貪黷抵於法尋移病歸

何岩字邦鎮正德丁丑進士授戶部浙江司主事監臨

清商稅繩吏寬商行旅頌之武宗南巡受金幣獎陞
員外郎中嘉靖初抗議大禮廷杖之時同舍創甚寢
疾若獨總數司事無留難出知瑞州府丁內艱再補
南雄罷梅嶺權稅復丁外艱補南康修白鹿書院增
置諸生講學西陲告急取才望實邊復調慶陽任滿
代歸

曹嘉字仲禮舉進士授庶吉士與閻閱史道抗疏諫遊
幸稱館中三傑授浙江道御史以直諫謫大名推官
嘉靖改元復原職議大禮廷杖謫歷城令再謫茂州
判復爲御史上百官圖忤權貴出守鳳陽真定陞山

西提學副使歷叅政按察使轉江西右轄所至多表

建以精悍稱

明史稱御史曹嘉素輕險上百官圖爲給事安磐疏駁又爲給事弋玉劾其背

違成法變亂國是故貶於外議
大禮廷杖諸臣皆在曹嘉貶後

杜紹字述之爲諸生以孝友聞暮年登第授戶部陝西
司主事監稅臨清括奸商隱匿會司內艱訂盟泉石
不復仕進居家以古道率人日披竹素修邑乘族譜
刻使南集行於世

劉瑞太學生授常山縣丞卻餽金緝捕皆身先卒役擢
興濟知縣會建昌驕縱其黨大肆請托不應威劫之
不奪遂解綬歸後以孫自強貴贈戶部侍郎

劉東瑞長子侗儻有大節嘉靖初遊太學友天下士士
覲丰采樂與結納從興濟公宦遊直建昌構怨仗義
挺身與之辨得直後募空同之賢遣子弟師事之卒
以子自強貴贈戶部侍郎

劉東瑞次子嘉靖戊子舉人初授棗陽知縣抑豪貴使
歸民侵地調岳陽檄查邊儲釐諸弊端陞昌平知州
以安民平寇自誓再補開州遷南康同知移病歸

劉自修拔諸生異等入太學卒業謁選授吳橋知縣節
費平徭興學息訟轉判真定府益勵清操陞靜寧知
州馴熟番寬鹽商再補祁州致仕歸

何岑嘉靖庚子舉人流寇師尙詔薄邑城急令幾亡去
岑強挽之爲畫策捍禦躬冒矢石設伏劫壘寇氣奪
夜澗邑以保全授廣宗知縣優調邢臺皆值大祲勸
賑糲粥招流移給之牛種兩邑得甦咸尸祝之有專
祠判河間督上谷餉檄覈宣大兵糧積弊一清上安
邊十策畫計襲寇大捷歸里賦詩教子世登科第

劉自強字體乾嘉靖甲辰進士授廣平府推官擢吏部
郎中秉銓不受請託時分宜柄政鬻爵自強峻拒之
爲所啣以太僕少卿出爲陝西叅議遷山西副使執
叛帥王慶晉秩應天尹甲子總簾京闈尋遷副都御

史巡撫四川支羅寇黃中奪龍潭安撫司印以叛自強往征之兵至巴郡妖黨蔡伯貫攻陷合州大足同梁諸邑連兵支羅自強一舉俱敗之入爲戶部侍郎提督大倉兼署部務上以金珠不繼召入面詰之言國用告匱當崇節儉事得寢轉南京都御史南兵部尙書改戶部召掌刑部請老歸田十載卒獲卹典進階資政大夫加宮保

劉自存字體心少聰穎過目成誦弱寇寇南宮初授行人冊封安南不辱命上嘉之陞兵部職方主事轉刑部郎中皆秉公執法利弊薰清加俸遷湖廣兵巡道

恩威並著人思慕焉

郝維喬字子遷嘉靖戊辰進士真定知縣以治行爲循
吏冠擢吏科給事遷戶刑兩科都諫奏議數千言皆
蒙嘉納數歷臬藩晉陝西右轄所在俱有政蹟民多
尸祝之年未及艾遂致政歸

杜化中字民孚嘉靖乙丑進士任順德司李擢工部主
事董修大內諸役有聲授御史出按福建疏擊閩帥
忤時相左遷直聲更著尋致仕清操素節出處一轍
著八閩奏議城南小草行於世

何出嗣字於岑之子萬曆丙戌進士清介絕俗通古

今抗鄰國出防纂修邑志鄉里賴之初授長子知縣
寬賑緩徵同勦回寇民建生祠充經房考官得士六
人陞職方平倅平播俱受上賞發倭逆之難聲振中
臺著雲華諸稿行於世年八十卒

何出光字兆文出圖之弟萬歷癸未進士授曲沃知縣
適晉中大饑括廩勸貸二萬餘賑之民無菜色當道
疏荒政第一徵拜監察御史時東廠太監張鯨用事
司房邢尙智招權受賄萬歷十六年出光劾鯨及尙
智錦衣都督劉守有相濟爲奸專擅威福罪當死者
八帝命鯨等劾守有相濟尙智守有職餘黨法司提

問按畿南徧歷郡縣問民疾苦再按山東發京考預
洩之弊出知太原府創斂解法盡革徵輸宿弊寢左
道逆謀忌者仍以侍御奪秩知完縣卒於官

縣志參
明府

王格少孤事嫡母及諸兄以孝友聞起明經授清豐縣
丞巡捕小灘却常例千金遷同州州同監稅漳關條
六議當路嘉納晉邵陽知縣庭無滯牘門無私謁入
覲聽察典應留還職乞骸骨以歸著政學囊穎集藏
於家

杜津以孝友著爲諸生試每寇軍登萬歷癸酉賢書仕
懷柔知縣歲大祲括粟勸貸撫流移數千繕城郭清

弊竇民有獲安堵賴杜母之頌時議開採額稅驟增
力爭之弗得忤當路意左遷考城諭尋移病歸賦詩
樂道自號心逸子

盧傳元字貞復性至孝登萬歷丙戌進士榆次知縣以
天下清官第一擢禮科給事遷刑右工左疏賑河南
大稔出叅議山東遷陝西副使留按察使航餉海外
拓邊收番戶再受賞疏糾稅闈不法鄉居遏決水灌
邑省邑站牛河工銀歲若干寇起製器仗先士民登
陣庚午詔進階中奉大夫著四書正音奏疏政畧集
藏於家

劉澤深字涵之萬歷辛丑進士密雲知縣改元氏遷刑部祥刑江南多所平反爲北平知府有白蓮教嘯聚清涼山設計獲其魁羣醜立消遷荆南叅藩闖寇發難馳至巴東上十四議發兵援重慶功成敘賚丁父艱服闋補叅藩擢陝西廉使晉右轄轉山西左轄與媚闖者忤爲所糾抗疏自白擢順天府尹巡撫虔南勦峒寇一歲三捷以疾歸起兵部侍郎疏平流寇宜反六玩破三難時稱確論進刑部尙書因論黃道周獄蒙譴者皆得寬貸時帝嚴厲積案千餘澤深日讞大獄數十以勞成疾累疏乞休不允強起視事遂卒

猶執筆在手云贈太子太保諭祭葬廕一子入監

張篤敬字崇誠萬歷辛丑進士授中書舍人已酉分校
燕闈辛亥擢南京給事中慙直爲當路所忌遂左遷
兩推郎署皆不就值魏璫建祠侃侃謝絕璫敗廷臣
交章特薦事詳頌天臚筆云

劉懋武由恩廕授前軍都督府督事轉經歷皆著殊績
歷武定澂江知府屢平巨寇羗人畏威士庶戴德擢
福建運使致仕有校閱書言故事草堂隨筆日時懸
鏡宦遊竒方行於世

盧榮春字崑華萬歷癸卯舉人授介休知縣多惠政繼

補灤縣均田賦抑勳戚遂爲忌者所中灤士民叩闕
爲之請者幾萬人歲餘乃得歸

王真卿字心鉉沉毅多勇畧流寇之亂挾策揭本兵馮
元颺馮奇之代陳稱旨復上安輯中原四事上大嘉
納授兵部職方主事賜勅印命救大梁晝夜兼程抵
武陟大梁已陷衆官屯河北真卿欲渡河巡方止之
曰河南大勢不可爲公勿輕險以取殃真卿抗言曰
此身已許朝廷受命之日卽盡命之日也遂渡河駐
登封出流賊所屯粟給散貧乏馳檄各寨諭以朝廷
恩意相率歸附土寇有擄掠人妻子者招服散給原

主全活數百帝遣使資金幣慰勞真卿感泣馳驅安撫五十餘寨聲勢遂振流寇逸潼關河南大有可爲會以疾卒未竟厥功士論惜之

盧傳姓性剛方教弟姪言笑不假稍不如規對案不食必改而後已以明經司訓天長人文蔚然歲饑捐俸賑粥人共德之引年旋里子孫遵遺訓焉

國朝杜俊彥性孝友持公方正邑人例以陳太丘凡有曲直多質成焉授廣西臨賀知縣天末辭邑猺獞雜處俊彥多方勸諭頑俗頓革鄰邑富川猺變粵督進勦檄協濟夫役火藥俊彥咄嗟立辦民不爲病粵督獎

其能賀有僞鎮投誠數年督歸疑其詐欲因富川
勦之民驚恐散匿俊彥星夜移文止重兵身爲緩定
僞鎮感且泣民乃安堵歲饑捐俸賑之多所全活僅
一載拮据成疾遂卒賀人爲立祠尸祝焉

杜之昂字叔抑天姿豪邁喜施予里中貧乏者多蒙其
惠登順治丁酉賢書仕平順知縣觀風問俗除私派
汰冗役剪豪強嚴保甲民情所利悉以便易處之有
豹爲民害昂爲文禱山神廟是夜豹死廟內人爭異
之晉御史監登聞康熙丁丑征噶爾旦須駝橐運糧
廷議州縣捐助昂恐騷動百姓獨議中止而別爲區

處顧閣部贊成之又以康節邵子與周程張朱並接道統從祀文廟而其後裔不得與周程張朱子孫並受博士之職疏奏得請彈劾貪穢不避顯要卒於仕西華縣人物

漢穎容字子嚴陳國長平人也博學多通善春秋左氏師事太尉楊賜郡舉孝廉州辟公車徵皆不就初平中避亂荊州聚徒千餘人劉表以爲武陵太守不肯起著春秋左氏條例五萬餘言建安中卒

後漢儒林傳

晉殷浩字深源陳郡長平人也父羨字洪喬爲豫章太守郡下人士因其致書者百餘函行次石頭皆投之

水中曰沉者自沉浮者自浮殷洪喬不爲致書郵其資性介立如此終於光祿勳浩識度清遠弱冠有美名尤善立言與叔父融俱好老易融與浩口談則辭屈著篇則融勝浩由是爲風流談論者所宗三府辟皆不就征西將軍庾亮引爲記室叅軍累遷司徒左長史安西庾翼復請爲司馬除侍中安西軍司並稱疾不起遂屏居墓所幾將十年於時擬之管葛王濛謝尚猶伺其出處以下江左興亡因相與省之知浩有確然之志旣反相謂曰深源不起當如蒼生何建元初庾冰兄弟及何充等相繼卒簡文帝時在藩始

綜萬幾衛將軍褚裒薦浩徵爲建武將軍揚州刺史
浩頻陳讓自三月至七月乃受拜焉時桓溫旣滅蜀
威勢轉振朝廷憚之簡文以浩有盛名朝野推伏故
引爲心膂以抗溫於是與溫頗相疑貳會遭父憂去
職服闋徵爲尚書僕射不拜復爲建武將軍揚州刺
史遂叅綜朝權潁川荀羨少有令聞浩擢爲義興吳
郡以爲羽翼王羲之密說浩羨令與桓溫和同不宜
內構嫌隙浩不從及石虎死胡中大亂朝廷欲遂蕩
平關河於是以浩爲中軍將軍假節都督揚豫徐兗
青五州軍事浩旣受命以中原爲已任上疏北征許

洛將發墜馬時威惡之既而以淮南太守陳達兗州
刺史蔡裔爲前鋒安西將軍謝尚北中郎將荀羨爲
督統開江西墾田千餘頃以爲軍儲師次壽陽潛誘
苻健大臣梁安雷弱兒等使殺健許以關右之仕初
降人魏脫卒其弟憬代領部曲姚襄殺憬以并其衆
浩大惡之使龍驤將軍劉啟守譙遷襄於梁旣而魏
氏子弟往來壽陽襄猜懼俄而襄部曲有欲歸浩者
襄殺之浩於是謀誅襄會苻健殺其大臣健兄子眉
自洛陽西奔浩以爲梁安事捷意苻健已死請進屯
洛陽修復園陵使襄爲前驅冠軍將軍劉洽鎮鹿臺

健武將軍劉邁據倉垣又求解揚州專鎮洛陽詔不許浩旣至許昌會張遇反謝尚又敗績浩還壽陽後復進軍次山桑而襄反浩懼棄輜重退保譙城器械軍儲皆爲襄所掠士卒多亡叛浩遣劉啟王彬之擊襄於山桑竝爲襄所殺桓溫素忌浩及聞其敗上疏罪浩廢爲庶人徙於東陽之信安縣浩少與溫齊名而每心競溫輕浩浩不之憚也至是溫謂郗超曰向使浩作令僕足以儀刑百揆朝廷用違其才耳浩雖被黜放口無怨言夷神委命談詠不輟雖家人不見其有流放之感但終日書空作咄咄怪事四字而已

後溫將以浩爲尙書令遺書告之浩欣然許焉將答
書慮有謬誤開閉者數十竟達空函大忤溫意由是
遂絕永和十二年卒子涓亦有美名咸安初桓溫廢
太宰武陵王晞誣涓及庾倩與晞謀反害之其後故
吏顧悅之上疏訟浩詔追復本官

晉書
本傳

殷顓字伯通陳郡人也祖融太常卿父康吳興太守顓
性通率有才氣少與從弟仲堪俱知名太元中以中
書郎擢爲南蠻校尉蒞職清明政績蕭舉及仲堪得
王恭書將興兵內伐告顓欲同舉顓不平之曰夫人
臣之義慎保所守朝廷是非宰輔之務豈藩屏之所

圖也晉陽之事宜所不豫仲堪要之轉切顓怒曰吾
進不敢同退不敢異仲堪甚以爲恨猶密諫仲堪辭
甚切至仲堪旣貴素情亦殊而志望無厭謂顓言爲
非顓見江績亦以正直爲仲堪所斥知仲堪當逐異
已樹置所親因出行散託疾不還仲堪聞其病出省
之謂顓曰兄病殊爲可憂顓曰我病不過身死但汝
病在滅門幸熟爲慮勿以我爲念也仲堪不從卒與
楊佺期桓元同下顓遂以憂卒隆安中詔曰故南蠻
校尉殷顓忠績未融奄焉隕喪可贈冠軍將軍

晉書本傳

南北朝宋殷景仁陳郡長平人也曾祖融晉太常祖茂

之特進左光祿大夫。道裕早亡，景仁少有大成之
量。司徒王謐見而以女妻之。爲宋武帝太尉行參軍。
歷位中書侍郎。景仁不爲文而敏有思致，不談義而
深達理。至於國典朝章舊章記注，莫不撰錄。識者知
其有當世之志也。嘗建議請百官舉才以所薦能否
黜陟。武帝甚知之。少帝卽位，補侍中。累表辭讓，優詔
申其請。以爲黃門侍郎。歷左衛將軍。文帝卽位，委遇
彌厚。俄遷侍中左衛如故。時與王華、王曇首、劉湛四
人並爲侍中，以風力局幹冠冕。一時同升之美。近代
莫及。元嘉三年，車駕征謝晦，司徒王宏入居中書下

省景仁長直共掌留任晦平代到彥之爲中領軍侍
中如故文帝所生章太后早亡上奉太后所生蘇氏
甚謹六年蘇氏卒車駕親往臨哭詔欲遵二漢推恩
之典景仁議以爲漢氏推恩加爵於時承秦之弊儒
術蔑如懼非盛明所宜軌蹈晉監二代朝政之所因
君舉必書哲王之所慎體至公者懸爵賞於無私奉
天統者每屈情以申制所以作孚萬國貽則後昆上
從之丁母憂葬竟起爲領軍將軍固辭上使綱紀代
拜遣中書舍人周赧與載詣府服闋遷尚書僕射太
子詹事劉湛代爲領軍湛與景仁素善皆被遇於

帝俱以宰相許之湛常居外任會王宏王華王曇首
相係亡景仁引湛還朝共叅朝政湛旣入以景仁位
遇本不踰已一旦居前意甚憤憤知文帝信仗景仁
不可移奪乃深結司徒彭城王義康欲倚宰相之重
以傾之十二年景仁遷中書令護軍將軍僕射如故
尋復加領吏部湛愈怒義康納湛言毀景仁於文帝
帝遇之益隆景仁密陳相王權重非社稷計上以爲
然景仁對親舊歎曰引之令入便噬人乃稱疾請解
不見許使停家養病湛議欲遣人若劫盜者於外殺
之以爲文帝雖知當不能傷至親之愛上微聞之徙

景仁於西掖門外晉鄱陽王第以爲護軍府密通宮
禁故其計不行景仁臥疾者五年雖不見上而密函
去來日中以十數朝政大小必以問焉影迹周密莫
有窺其際者及將收湛之日景仁便拂拭衣冠寢疾
旣久左右皆不悟其意其夜上出華林園延賢堂召
之景仁猶稱脚疾小林輿以就坐誅討處分一皆委
之代義康爲揚州刺史僕射吏部如故遣使者授印
綬主簿代拜畢便覺疾甚情理乖錯性本寬厚而忽
更苛暴疾篤文帝謂不利在州使還住僕射下省月
餘日卒或云見劉湛爲臬追贈侍中司空諡曰文成

公大明五年孝武行經景仁墓詔遣致祭

淳字粹遠景仁從祖弟也祖允晉太常父穆以和謹致稱自五兵尚書爲宋武帝左長史元嘉中位特進右光祿大夫領始興王師卒官謚曰元子淳少好學有美名歷中書黃門侍郎黃門清切直下應留下省以父老特聽還家高簡寡言早有清尚愛好文義未嘗違捨在祕書閣撰四部書大目凡四十卷行於世元嘉十一年卒朝廷痛惜之子孚有父風位吏部郎爲順帝撫軍長史子臻字後同幼有名行袁粲褚淵竝嘗異之每造二公之席輒清言畢景王儉爲丹陽尹

引爲郡丞歷位太子洗馬淳弟淡字夷遠亦歷黃門

吏部郎中太子中庶子大明中又以文章見知

南史本傳

殷孝祖陳郡長平人也曾祖羨晉光祿勳父祖宦並不

達孝祖少誕節好酒色有氣幹宋孝武時以軍功仕

至積射將軍前廢帝景和元年爲兗州刺史明帝初

卽位四方反叛孝武外甥司徒參軍潁川荀僧韶建

議銜命徵孝祖入朝上遣之時徐州刺史薛安都遣

薛索兒等屯據津徑僧韶間行得至說孝祖曰景和

凶狂開闢未有朝野憂危假命漏刻主上曾不浹辰

夷凶翦暴國亂朝危宜立長主公卿百辟人無異議

而羣迷相扇構造無端貪利幼弱競懷希幸舅少有
立功之志長以氣節成名若能控濟河義勇遠奉朝
廷非唯匡主靜亂乃可以垂名竹帛孝祖卽日棄妻
子率文武二千人隨僧韶還都時普天同逆朝廷唯
保丹陽一郡孝祖忽至衆力不少人情於是大安進
孝祖號冠軍將軍假節督前鋒諸軍事御仗先有諸
葛亮筒袖鎧鐵帽二十五石弩射之不能入土悉以
賜孝祖孝祖負其誠節陵轍諸將時賊據赭圻孝祖
將進攻之與大將王元謨別悲不自勝衆並駭怪泰
始二年三月三日與賊合戰每戰常以鼓蓋自隨軍

中人相謂曰殷統軍可謂死將矣今與賊交鋒而以羽儀自標顯若射者十手攢射欲不斃得乎是日中

流矢死追贈建安縣侯諡曰忠

南史本傳

梁

殷鈞字季和陳郡長平人九歲以孝聞及長恬靜簡

交游好學有思理善隸書爲當時楷法南鄉范雲樂

安任昉竝稱美之梁武帝與鈞父獻少故舊以女永

興公主妻鈞拜駙馬都尉歷祕書丞在職啓校定祕

閣四部書更爲目錄又受詔料檢西省法書古迹列

爲品目累遷侍中東宮學士自宋齊以來公主多驕

淫無行永興主加以險虐鈞形貌短小爲主所憎每

被召入先滿壁爲殷獻字鈞輒流涕以出主命婢束而反之鈞不勝怒而言於帝帝以犀如意擊主碎於背然猶恨鈞自侍中出爲王府諮議後爲明威將軍臨川內史鈞體羸多疾閉閣臥理而百姓化其德劫盜皆奔出境嘗禽劫帥不加考掠所言誚責劫帥稽顙乞改過鈞便命遣之後遂爲善人郡舊多山瘡更暑必動自鈞在任郡境無復瘡疾母憂去職居喪過禮昭明太子憂之手書戒諭服闋爲散騎常侍領步兵校尉侍東宮改領中庶子後爲國子祭酒卒諡貞二子構渥鈞宗人芸

芸字灌蔬侗不拘細行然不妄交游門無雜客勵精

勤學博治羣書幼而廬江何憲見之深相歎賞天監

中位祕書監司徒左長史後直東宮學士省卒

南史本傳

唐殷踐猷字伯起陳給事中不害五世從孫博學尤通

氏族曆數醫方與賀知章陸象先韋述最善知章嘗

號爲五總龜謂龜千年五聚問無不知也初爲杭州

參軍舉文儒異等科授祕書省學士用曹州司法參

軍兼麗正殿學士以叔父喪哀慟歐血而卒年四十

八少子寅舉宏辭爲太子校書出爲永寧尉吏侮謾

甚寅怒殺之貶澄城丞病且死以母蕭老不忍決及

歛其子亮斷指剪髮置棺中自誓事祖母如寅在其後侍蕭疾不脫衣者數年有白鷺巢其楣後終給事中杭州刺史踐猷弟季友歷祕書郎善畫從父仲容終冬官郎中有重名子承業以謹樸稱歷太子左諭德右威衛將軍族子成已晉州長史初母顏叔父吏

部郎中敬仲爲酷吏所陷率二妹割耳訴冤敬仲得

減死及成已生而左耳缺云

唐書儒學傳省志載率二女似悞

宋何中立舉淳熙七年進士第一授建寧府司戶有部民告其長不法數事卽付長治之或曰此非縱奸耶中立曰下官不職黜之在上輕信人言權移於下時

人以爲得體召拜宏文館直學士以言時政不合免歸著書自娛屢徵不應

元徐世隆字威卿弱冠舉進士京朝官辟爲縣令其父

戒以少年毋急仕進遂辭官篤志於學奉母北渡河

嚴實招致東平幕府掌書記憲宗卽位授權勾燕京

路稅課固辭世祖在潛邸召見時將攻雲南以問對

曰孟子有言不嗜殺人者能一之世祖曰誠如卿言

吾事濟矣擢燕京等路宣撫使移治順天除太常卿

提督本路學校世祖問堯舜禹湯文武爲君之道取

書所載事譯寫以進遷吏部尚書乞外補佩虎符爲

東平路總管會征日本上書諫止召爲翰林院學士
集賢院學士皆以疾辭世隆威儀魁梧襟度弘博尤
精律令善決疑獄安童再相奏世隆雖老尚可用遣
使詔之以疾辭附奏便宜九事賜田十頃

明宋伯義剛介有守見義必爲洪武時以才行舉奏對
稱旨授山西平陽知府時當草創興學校均田里定
賦徭闔郡著爲定式永樂初陞山東右叅政尋轉陝
西左叅

尹醇字敬修博學能文明當世之務以貢卒業成均應
詔陳便宜見納授禮科右給事轉左給事抗節立朝

有直聲陞四川叅政

李澄字天映成化辛丑進士初授句容知縣爲政廉明
三載政事咸理仁聲懋著巡撫王恕巡按孫昇交章
推薦擢山西道監察御史彈劾無所遜避權近多畏
憚之弘治己酉巡視陝西辛亥巡蘇松諸郡癸丑復
巡眞保等府風紀益振乙卯照刷南畿文卷丁巳陞
江西副使瑞州賊勢猖獗郡縣騷動鎮巡議捕之衆
皆憚往澄毅然請行賊聞輸罪就擒境內肅然巡按
馮清稱其持憲嚴明讞獄詳盡銓曹方薦爲按察使
會以母病解組乙丑冬邊報急詔下大臣選將材侍

郎李 鏗薦之固辭不起隱於城南建樓聚書日引諸
子講學其間令節速客觴詠因號城南居士

王敬民 字用司隆慶辛未進士兩爲司李皆有能聲行
取吏科給事中歷工右吏左工科都給事彈劾不避
權貴 山陵之役議者如聚蚊得敬民論始定出使朝
鮮禮 戒而歸陞太常大理少卿右僉都御史巡撫南
贛務 持大體時閩廣交衝奸人潛伏故事重以惠文
顧獨 以寬和馭之然綱紀肅清無敢犯者南雄南安
之界 素稱盜藪窮治不能得赦其罪許令自新盜遂
解散 關市之征主者多染指立格以禁請告歸直長

大禘 出資周之全活無算熈黨之間尤加篤云

胡嘉棟 字隆宇萬歷乙未進士司理武昌加意菁莪出其門下者皆知名士行取南吏部主事擢兵科給事中彈劾所及冢宰爲斂容焉然好惡過明招怨亦易薑桂之性終不變也居鄉多善行如重建學宮修社稷壇築護城堤負郭田不受水患至今賴之

金勵 字季孺萬歷乙未進士初授太原知縣調陽曲遷南行人司副戶部浙江司員外郎中出爲寧國知府擢徽甯道改江西副使養親回籍起東昌道陞叅政敷歷所至潔已愛民皆有能聲起書院延名儒討論

聖賢宗旨所著有八行芳規明手斧鋤吾廬放言秋
浦得盜錄等書行於世學國士紳至今尸祝事載熹
宗實錄

王省身字豫凡遂於理學遠近鉅儒多歸之有利善圖
詳說行世舉進士任高平知縣修城池行保甲著鄉
約解民立祠祀之擢刑部主事陞員外郎中卒

王所夢字見洲居鄉以和易聞成進士授完縣知縣清
廉愷悌所著有曲逆八政擢兵部職方主事未幾卒
張善政字苧蘿萬歷己未進士由中書舍人入校京闈
獲名士十人悉登甲第考選南京江西道御史籌邊

助餉三千金帝嘉其奉公特勅慰勞焉

胡嘉桂字芳宇素性仁厚居鄉多所解推由進士任定興知縣保民若子有貧者給以資本令紡織自贍間有干罪者罰墾荒地令輸草根準過之大小爲多寡逾一載開地百餘頃卒於任士民建祠城東北爲之聯曰冷面熱腸精爽不隨煙霧散一年千載恩波只並日星垂

王璉字宗器湖廣德安府通判清介自持俸外一無所取罷官之日遽然一儒素始終好學務在成就後人及門之士多俊彥云

張致祥字惟和博學能詩於物無競司鐸羅山值歲大
葭里人求濟戶外之屨常滿傾囊以周又稱貧而益
之室人交謫不顧也歸惟一笈數椽茅屋抱膝而歌
可謂君子

王夢龍字仲雲由明經任周府教授自諸生至宦遊惟
以讀書爲務字法二王咿唔之暇登山臨水家徒四
壁泊如也

姚德溥號澤寰心理學垂三十年文尚靈創一切時
習弗屑也及門士數百人諭固始拔唐特明之文於
諸生日此元局也已而果驗擢知禹城縣孤行我法

卒爲論者所搆

張一龍字文見豁達有度口不言人過常行田間見竊木綿者引身避之其人來謝辭以未見厨人婚喪惟恐不給施子之性始終如一

于登俊字顯明偉碩多權畧善騎射交與多圉訪賢豪明末楊四王三等倡亂擾鄆境睢陳兵備張檄俊爲團練使率衆縛斬之餘黨悉平繼而中州鼎沸歲祲飢殍相枕藉俊乃選壯勇修堡砦額產賑飢稚牛饗士曰有燬庭舍發邱墓掠子女財帛者殺不宥壁壘肅然巨寇一斗谷闔榻天等皆不敢犯遠近歸之俊

推心置腹加禮紳士分田廬時緩急恤貧發施藥槩
瘞殫齒當事嘉其功歷叅將團練護農總戎甲申大
兵入境俊納前印授兵械於庫督撫將薦用之以疾
辭築圃舍傍繞蘭蕙竹嘯咏其間卒之且遠近會葬
者有數千人

國朝王鼎鎮字禹烈明崇禎辛未進士授陝西西安府推
官行取考選授廣西道監察御史巡按淮揚轉四川
川北道改湖廣衡永擢尚寶司少卿應天府府丞

本朝改授江南驛傳道按察司副使清訟獄却苞苴所至
有聲以病回籍多購書籍勸迪後進刻期立程第其

文之高下而誘掖之西華久遭寇難絃誦衰歇至是
文風特盛

王遵訓字信初鼎鎮子順治乙未進士入庶常遷 躡

南苑 命賦瀛臺千言立就

世祖嘆賞其敏捷尋授監察御史剛直不少阿奏疏凡百十
上皆切時政多見嘉納奉差巡視茶馬朝有增引之
議遵訓力言其不可奏罷之除僉都御史歷遷政左
叅太常卿戶部右侍郎卒未艾卽告歸書宗二王

世祖常命書御屏以書法第一目之自是索書者益衆刻怡
園帖人爭寶之著有紀數畧二十卷奏疏遺草餘清

軒詩集行於世

王光臯字賓虞容質偉岸有幹練才司鐸考城林縣上官器其能嘗虛左延訪以薦遷臨晉知縣時準噶爾丹跳梁西陲軍行旁午務爲寬簡與民休息士民德之後以失察通關去官人咸惜焉

王光夔字西村康熙丁巳舉於鄉授瀘溪知縣攝沅陵所在賑飢雪冤減徭均賦多善政士民勒石感誦

王光奭字檢齋幼英敏慷慨讀書日誦萬言淮西苦食淮鹽至鬻子女償逋課司農遵訓爲鄉里憂思有以蠲之而未得幹練人奭年十七承父志南走吳楚北

走燕冀歷四寒暑鞍馬弗輟卒奏改蘆鹽陳屬七邑
得免縲絏夷父子力也甲子秋雋而復失乃以選貢
授渭源知縣治行第一歷刑戶郎曹以廉幹名兩差
讞江南大獄擢天津道忤上官意劾罷之

聖祖察其誣特授陝西涼莊道時策妄跳梁單騎馳赴飛輓
芻粟迄無悞事奉委修三道柳溝城去嘉峪五百里
材木甃石皆取辦口內輓運維艱人皆憚往夷慨然
無難色役長二人凶悍數挾衆梗工夷內之者一日
散役工作立召二人杖斃之衆咸股栗出是併力
事不日告成地乏水度土脈合井

公并因是勞悴與疾以歸猶於枕上擘畫軍饗兵民感泣爲立祠東郭城崇祀名宦城亦爽所築以處兵者也

金士淳字淑子孝義醇篤秉鐸泌陽立四社課士多所

裁成遷聊城知縣邑故貧瘠一歲中旱蝗水三告力

請於上議格不行深自憤懣乃以鹿車輦災狀訴詞

三千餘紙泣請上官僅免徭賦什一乃破產賑貸百

法恤救憂勞病瘠歲餘卒於官士民哀感立祠祀之

張圻隆字禹服幼而岐嶷成童後未嘗一忤父母顏侍

疾居喪備極哀慕已亥成進士授蒲圻知縣值饑饉

拯急貸乏緩征徭清侵冒活者萬計決疑讞拔單寒
蒲志學校城池以次修舉未幾去官

王廷翰字憲伯丰儀峻潔以歲貢訓導虞城經師人表
興賢造士訓示所及虞士彬彬興起焉遇疾正衣冠
危坐而逝

張本洙字聖裔性廉直嗜學家貧教授里中有趙鵬髻
年慧而孤乃招至家炊以衣食數載遂有名諸生其
獎借後進如此除內黃教諭修廢舉墜砥士礪行學
校之政靡不畢張邑宰以學行第一薦之遽卒

袁大夏字禹侯二歲失怙恃長於從伯父母先意承志

少不懌輒孩笑於側待和悅而後退伯亡無子遂以爲嗣以明經訓導河陰立社課士文風丕變後與族人袁法古等共理祀田亦追遠之誠所寄云

商水縣人物

〔宋〕張輅家世忠孝性沉靜有識鑒博學善屬文以子封著作郎鄉人推典型焉

姚仲孫字茂宗本曹南著姓曾祖仁嗣陳州商水令因家焉父暉進士第一官止著作佐郎仲孫早孤事母孝擢進士補許州司理叅軍民婦馬氏夫被殺以誣里胥仲孫請於知州曰幸毋遽決後果得殺人者調

邢州推官徙資州更二守皆老事多決於仲孫運使
檄詣富順監按疑獄全活數十人改大理寺丞知建
昌縣先時運茶抵南康露積於道爲霖潦所敗主吏
多破產乃勸吏民卽高阜爲倉邑人利之徙判彭州
上禦戎料敵之策名防邊龜鑑謂天下雖無事不可
弛兵備改睦州歲旱有詔賑民吏不時給仲孫劾主
吏夜索丁籍盡給之累遷屯田戶部二員外郎王驥
守益辟通判州事召爲右司諫上方齋太廟而都知
閻文應叱醫官聲聞御所及郭后暴崩中外莫不疑
寘毒者旣出爲秦州兵馬鈐轄稱疾復留仲孫再論

之乃亟去除起居舍人歷知諫院管勾國子監兼知
雜御史時諫議大夫至十二員仲孫奏謂是職朝廷
妙選不宜歲月序進若視年勞槩授則數年之外其
員益多請艱其選以處材望之臣餘悉次補卿監乃
詔當選者奏聽旨初以諸路提刑還朝多擢省府請
第其課爲三等升黜之卽詔領司考課之法歷三司
戶部度支鹽鐵副使進天章閣待制河北都轉運使
大修城壘兵備仁宗賜詔褒之權知澶州河壞明公
埽絕浮橋仲孫親總役堤上埽一夕復完權知大名
夜領禁兵塞金堤決河是歲澶魏雖大木民不及患

進禮部郎中龍圖閣學士權三司使屬西北備邊募

兵益屯及賞賜聘問之費不可勝計皆悉心經度尋

坐小吏詐爲文符出知蔡州因母憂喪一目卒

宋史本傳

明謝直方洪武十九年舉賢良方正仕至福建布政使
左叅議居心端正制行高潔人尊仰之

華能由貢生任真定府同知政尚寬平教民必躬修以
先之棘園蝟羅而武悍已遠矣以病告歸里人式其
行事比之萬石君石奮云

王濫舉人除太常丞擢通政司左叅議丰采峻整言詞

嫻雅帝甚眷顧將不次用以病卒於官天順七年遣

禮部侍郎李紹賜祭

王榮溢之子景泰庚午舉人任山東海豐知縣政治寬平不事操切留心民瘼不便者改而張之好惡協輿情有古循良風

王相榮之子由進士除博士尋擢御史年方二十餘少登巍科任顯秩務殫厥心知無不言一時有鐵面之譽卒爲當道所忌謫縣丞轉府同知後陞浙江按察僉事所至稱仁明焉

國朝李振奇順治十一年拔貢授江南如臯知縣時鄭賊叛逆東方擾亂奇固城禦寇康父黎庶一方賴以保

障學優品端鄉國尤推典型云

李震普字布青貢生候選知州幼聰敏授書卽解大義
孝友敦倫紀年十二父蘭禧患癱病篤焚香書牒願
減齡益父壽事繼母魯尤誠孝母亦忘其非已出兄
震昇夫婦子媳相繼病沒止存七歲孫秉仁撫養保
護偉然成令器終身同居內外無間言念兄責志未
遂乃表其生平實蹟題請建坊入祠又以明倫堂年
久傾圮獨力捐修煥然丕新立義學起書樓延師督
課來學者甚衆文風益振所居西馬坡南臨沙河北
臨渚河周圍二十餘里居民千餘家雍正八年河水

暴至勢甚危急震普捐木椿秫稽率六百餘人給以
飲食資脯晝夜堅築保固得無恙乾隆四年臨河堤
岸暴水衝决時震普病篤仍命子弟輩如前料理賴
以保全又修周家口板橋一座黃家冲草堂兩處石
橋二座行人便之乾隆元年二年連荒出粟千石平
糶每石減錢二百會負數千金悉焚其券至於綿衣
丸散棺木之施凡有見聞無不周濟督撫及諸當事
屢題額旌其門

項城縣人物

漢應奉字世叔南頓人也曾祖父順字華仲和帝時爲

河南尹將作大匠公廉約已明達政事生十子皆有

才學中子疊江夏太守疊生彬武陵太守彬生奉奉

少聰明自爲童兒及長凡所經履莫不暗記讀書五

行竝下爲郡決曹史行部四十二縣錄囚徒數百千

人及還太守備問之奉口說罪繫姓名坐狀輕重無

所遺脫時人奇之漢書後序多所述載大將軍梁

冀舉茂才先是武陵蠻詹山等四千餘人反叛執縣

令屯結連年詔下公卿議四府舉奉才堪將帥永興

元年拜武陵太守到官慰納山等皆悉降散於是興

學校舉側陋政稱變俗坐公事免延熹中武陵蠻復

寇亂荊州車騎將軍馮緄呂奉有威恩爲蠻夷所服
上請與俱征拜從事中郎奉勤設方略賊破軍罷緄
推功於奉薦爲司隸校尉糾舉姦違不避豪戚呂嚴
厲爲名及鄧皇后敗而田貴人見幸桓帝有建立之
議奉呂田氏微賤不宜超登后位上書諫帝納其言
竟立竇皇后及黨事起奉乃慨然呂疾自退追愍屈
原因呂自傷著感騷三十篇數十萬言諸公多薦舉
會卒子劭

劭字仲遠少篤學博覽多聞靈帝時舉孝廉辟車騎將
軍何苗掾中平二年漢陽賊邊章韓遂與羌胡爲寇

東侵三輔時遣車騎將軍皇甫嵩西討之嵩請發烏桓三千人北軍中候鄒靖上言烏桓衆弱宜開幕鮮卑事下四府大將軍掾韓卓議曰爲烏桓兵寡而與鮮卑世爲讎敵若烏桓被發則鮮卑必襲其家烏桓聞之當復棄軍還救非唯無益於實乃更沮三軍之情鄒靖居近邊塞究其態詐若令靖募鮮卑輕騎五千必有破敵之效劭駁之曰鮮卑數犯障塞且無寧歲唯至互市乃來靡服苟欲中國珍貨非爲畏威懷德計獲事足旋踵爲害是曰朝家外而不內往者匈奴反叛度遼將軍馬續烏桓校尉王元發鮮卑五千

餘騎又武威太守趙沖亦率鮮卑征討叛羌斬獲醜
虜旣不足言而鮮卑越溢多爲不法裁曰軍令則忿
戾作亂制御小緩則陸掠殘害今狡寇未殄而羌爲
巨害如或致悔其可追乎臣愚曰爲可募隴西羌胡
守善不叛者簡其精勇多其牢賞太守李參沈靜有
謀必能獎厲得其死力當思漸消之略不可倉卒望
也韓卓復與劭相難反覆於是詔百官大會朝堂皆
從劭議三年舉高第再遷六年拜泰山太守初平二
年黃巾三十萬衆入郡界劭糾率文武連與賊戰前
後斬首數千級賊皆退却郡內呂安與平元年前太

尉曹嵩及子德從琅邪入泰山劭遣兵迎之未到而
徐州牧陶謙素怨嵩子操數擊之乃使輕騎追嵩德
竝殺之於郡界劭畏操誅棄郡奔冀州牧袁紹獻帝
善之二年詔拜劭爲袁紹軍謀校尉時始遷都於許
舊章堙沒書記罕存劭慨然嘆息乃輟集所聞著漢
官禮儀故事凡朝廷制度百官典式多劭所立初父
奉爲司隸時竝下諸官府郡國各上前人像贊劭乃
連綴其名錄爲狀人紀又論當時行事著中漢輯序
撰風俗通呂辯物類名號識時俗嫌疑文雖不典後
世服其治聞凡所著述百三十六篇又集解漢書皆

傳於時後卒於鄴弟子瑒璩竝呂文才稱中興初有
應嫗者生四子而寡見神光照社試探之乃得黃金
自是諸子宦學竝有才名至瑒七世通顯

後漢書本傳

蔡元字叔陵南頓人也學通五經門徒常千人其著錄
者萬六千人徵辟竝不就順帝特詔徵拜議郎講論
五經異同甚合帝意遷侍中出爲弘農太守卒官

後漢

書儒林傳

蔡衍字孟喜項人也少明經講授呂禮讓化鄉里鄉里
有爭訟者輒詣衍決之其所平處皆曰無怨舉孝廉
稍遷冀州刺史中常侍具瑗託其弟恭舉茂才行不

受乃收齋書者案之又劾奏河間相曹鼎臧罪千萬
鼎者中常侍騰之弟也騰使太將軍梁冀爲書請之
衍不答鼎竟坐輪作左校乃徵衍拜議郎符節令梁
冀聞衍賢請欲相見衍辭疾不往冀恨之時南陽太
守成瑨等曰收糾宦官考廷尉衍與議郎劉瑜表救
之言甚切厲坐免官還家杜門不出靈帝卽位復拜

議郎會病卒

後漢書
黨錮傳

三國魏應瑒字德璉珣之子太祖辟爲丞相掾屬轉平原

侯庶子後爲五官將文學始文帝爲五館中郎將與
植皆好文學瑒及山陽王粲北海徐幹廣陵陳琳陳

留阮瑀東平劉禎並見友善咸著文賦數十篇後文

帝書與元城令吳質曰昔年疾疫親故多罹其災徐

陳應劉一時俱逝德璉常斐然有述作意其才學足

以著書美志不遂良可痛惜場弟璩以文章顯

節三國志

應璩字休璉博學好屬文善爲書記明帝世歷官散騎

常侍齊王卽位稍遷侍中大將軍曹爽秉政多違法

度璩爲詩以諷焉其言雖頗諧合多切時要世共傳

之復爲侍中典著作嘉平四年卒追贈衛尉

文章敘錄

吳程秉字德樞南頓人也逮事鄭玄後避亂交州與劉

熙考論大義遂博通五經士熒命爲長史權聞其名

儒以禮徵秉旣到拜太子太傅黃武四年權爲太子
登聘周瑜女秉守太常迎妃於吳權親幸秉船深見
優禮旣還秉從容進說登曰婚姻人倫之始王教之
基是以聖王重之所以率先衆庶風化天下故詩美
關雎以爲稱首願太子尊禮教於閨房存周南之所
詠則道化隆於上頌聲作於下矣登笑曰將順其美
匡救其惡誠所賴於傅君也病卒官著周易摘尚書

駁論語彌凡三萬餘言

三國志本傳

晉應貞字吉甫南頓人魏侍中

璩之子也善談論以才

學稱舉高第頗歷顯位武帝爲撫軍大將軍以爲參

軍及踐祚遷給事中帝於華林園宴射貞賦詩最善
初置太子中庶子官貞與護軍長史孔恂俱爲之後
遷散騎常侍以儒學與太尉荀顛撰定新禮未施行
泰始五年卒文集行於世弟純純子紹永嘉中至黃
門郎爲東海王越所害純弟秀秀子詹自有傳

傳

晉書
文苑

應詹字思遠南頓人幼孤爲祖母所養年十餘歲祖母
又終居喪毀頓杖而後起遂以孝聞家富於財年又
稚弱乃請族人共居委以資產情若至親世以此異
焉弱冠知名姓質素宏雅物雖犯而弗之校以學藝

文章稱司徒何劭見之曰君子哉若人初辟公府爲太子舍人趙王倫以爲征東長史倫誅坐免成都王穎辟爲椽時驃騎從事中郎諸葛玫委長沙王乂奔鄴盛稱乂之非玫浮躁有才辯臨漳人士無不詣之詹與玫有舊嘆曰諸葛仁林何與樂毅之相詭乎卒不見之玫聞甚愧鎮南大將軍劉宏詹之祖舅也請爲長史謂之曰君器識弘深後當代老子於荆南矣仍委以軍政弘著績漢南詹之力也遷南平太守王澄爲荊州假詹督南平天門武陵三郡軍事及洛陽傾覆詹攘袂流涕勸澄赴援澄使詹爲檄詹下筆便

成辭義壯烈見者慷慨然竟不能從也天門武陵谿蠻並反詹討降之時政令不一諸蠻怨望並謀背叛詹召蠻酋破銅券與盟由是懷詹數郡無虞其後天下大亂詹境獨全百姓歌之鎮南將軍山簡復假詹督五郡軍事會蜀賊杜疇作亂來攻詹郡力戰摧之尋與陶侃破杜弢於長沙賊中金寶溢目詹一無所取唯收圖書元帝假詹建武將軍王敦又上詹建巴東五郡軍事賜爵潁陽鄉侯陳人王冲擁衆荊州素服詹名迎爲刺史詹以冲等無賴棄遠南平冲亦不怨其得人情如此遷益州刺史領巴東監軍詹之出

郡也士庶攀車號泣若戀所生俄拜後軍將軍詹上
疏陳便宜元帝雅重其才深納之頃之出補吳國內
史以公事免鎮北將軍劉隗出鎮以詹爲軍司加散
騎常侍累遷光祿勳詹以王敦專制自樹故優游諷
詠無所標明及敦作逆明帝問詹計將安出詹厲然
慷慨曰陛下宜奮赫斯之威臣等當得負戈前驅庶
憑宗廟之靈有征無戰如其不然王室必危帝以詹
爲都督前鋒軍事護軍將軍假節都督朱雀橋南賊
從竹格渡江詹與建威將軍趙盾等擊敗之斬賊卒
杜發梟首數千級賊平封觀陽縣侯疏議不許遷使

持節都督江州諸軍事平南將軍江州刺史時王敦
新平人情未安詹撫而懷之莫不得其懽心百姓賴

之咸和六年卒年五十三册贈鎮南大將軍儀同三

司謚曰烈祠以太牢子玄嗣位至散騎侍郎元弟誕

有器幹歷六郡太守龍驤將軍追贈冀州刺史

晉書本傳

南北朝梁周興嗣字思纂陳郡項人也世居始熟博學

善屬文嘗步自始熟投宿逆旅夜有人謂曰子才學

邁世初當見識貴臣卒被知英主言終不測所之梁

天監初奏休平賦其文甚美武帝嘉之拜安成王國

侍郎直華林省其年河南獻舞馬詔興嗣與待詔到

沈張率爲賦帝以興嗣爲工擢拜員外散騎侍郎進直文德省武帝以三橋舊宅爲光宅寺敕興嗣與陸倕各製寺碑及成俱奏帝以興嗣所製自題銅表銘柵塘碣檄魏文次韻王羲之書千字並使興嗣爲文每奏帝稱善賜金帛後佐撰國史興嗣兩手患風疽又染厲疾左目盲帝撫其手嗟曰斯人而何斯疾手疏疽爲以賜之十七年爲給事中直西省普通二年卒所撰皇帝實錄皇德記起居注職儀等百餘卷文

集十卷

南史文
學傳

袁翻字景翔陳郡項人也父宣爲朱青州刺史沈文秀

府主簿隨文秀入魏翻少入東觀爲徐紇所薦李彪
引兼著作佐郎參史事後拜尚書殿中郎同議律令
除豫州中正有修明堂辟雍選邊戍議遭母憂去職
熙平初除廷尉少卿頗有不平之論爲靈太后所責
出爲陽平太守甚不自得遂作思歸賦神龜末遷涼
州刺史時蠕蠕主阿那瓌後主婆羅門竝以國亂來
降朝廷問安置之計翻表蠕蠕部落猶衆高車亦未
能一時并兼若蠕蠕無復豎立令高車獨擅北垂則
西顧之憂匪旦伊夕蠕蠕二主竝宜存之居阿那瓌
於東徧處婆羅門於西裔分其降人各有攸屬那瓌

住所非所經見不可輒陳婆羅門請修西海故城以
安處之西海郡本屬涼州北虜往來之衝要漢家行
軍之舊道土地沃衍大宜耕殖非但今處婆羅門卽
可永爲重戍鎮防西北一二年後足食足兵斯固安
邊保塞之長計也今不早圖戎心一啟脫先據西河
奪我嶮要則酒泉張掖自然孤危長河已西終非國
有乞遣大使往涼州燉煌及於西海躬行山谷要害
之所親閱亭障遠近之宜商量士馬校練糧仗部分
見定處置得所入春西海之間卽令播種至秋收一
年之食使不復勞轉輸之功也且西徼北垂卽是大

積野獸所聚正是蠕蠕射獵之處殖田以自供籍獸
以自給彼此相資足以自固今之豫度似如小損歲
終大計其利實多朝議是之還拜吏部郎中遷齊州
刺史無多政績孝昌中除安南將軍中書令領給事
黃門侍郎與徐紇俱在門下竝掌文翰翻旣才學名
重又善附會亦爲靈太后所信待是時蠻賊充斥六
軍將親討之翻乃上表諫止後蕭寶夤大敗於關西
翻上表請爲西軍死亡將士舉哀存而還者并加賑
賚後拜度支尙書尋轉都官翻上表願以安南尙書
換一金紫時天下多事翻雖外請閑秩而內有求進

之心識者怪之於是加撫軍將軍明帝靈太后會燕
華林園舉觴謂羣臣曰袁尙書朕之杜預欲以此杯
敬屬元凱今爲盡之侍坐者莫不羨仰翻名位俱重
當時賢達咸推與之榮獨善其身無所獎拔排抑後
進論者鄙之建義元害河陰所著文筆百餘篇行
於世贈使持節侍中車騎將軍儀同三司青州刺史
嫡子寶首武定中司徒記室參軍事翻弟躍

躍字景騰博學儁才性不矯俗篤交友翻每謂人曰躍
可謂我家千里駒也歷位尙書都兵郎中加員外散
騎常侍將立明堂躍乃上議當時稱其博洽蠕蠕主

阿那瓌亡破來奔朝廷矜之送復其國旣而每使朝
貢辭旨頗不盡禮躍爲朝臣書與瓌陳以禍福言辭
甚美後遷車騎將軍太傅清河王懌文學雅爲懌所
愛賞懌之文表多出於躍卒贈冠軍將軍吏部郎中
所制文集行於世無子兄翻以子聿修繼

聿修字叔德七歲遭喪居處禮若成人九歲州辟主簿
性深沉有鑒識清靖寡欲與物無競年十八領本州
中正兼尚書度支郎中齊天保初除大子庶子以本
官行博陵太守大有聲績遠近稱之累遷司徒左長
史領兼御史中丞司徒錄事參軍坐事免中丞尋遷

秘書監天統中詔與趙郡王獻等議定三禮出爲信

州刺史卽其本鄉也時久無例莫不榮之爲政清靖

不言而化自長史以下爰逮鰥寡孤幼皆得其歡心

武平初御史普出過諸州悉有舉劾唯不到信州及

還都人庶道俗追列滿道或將酒脯涕泣留連競欲

遠送時旣盛暑恐其勞敝往往爲之駐馬隨舉一酌

示頷其意辭謝令去還後州人鄭播宗等七百餘人

請爲立碑斂縑布數百尺託中書侍郎李德林爲文

以記功德敕許之尋除都官尚書肆修少年平和温

潤素流之中最爲規檢以名家子歷任清華時望多

相器待許其風鑒入周位儀同大將軍吏部下大夫
東京司宗中大夫隋開皇初加上儀同除都官尚書
出爲熊州刺史卒子知禮大業初卒於太子內舍人
躍弟颺卒於豫州冠軍府司馬

北史
本傳

宋喬維岳字伯周陳州南頓人治三傳周顯德初登第
授太湖簿遷平輿令開寶中薦爲太子中舍知高郵
軍通判揚常昇三州改殿中丞太平興國初徙襄州
丁內艱值陳洪進子文顯領泉州留後朝議擇能臣
關掌郡事起爲泉州通判會仙遊盜起率衆數萬來
攻城中兵裁三千勢甚危急監軍何承矩王文寶欲

屠其民燔府庫而遁維岳抗議以爲朝廷寄以綏遠
今惠澤未布盜賊連結反欲屠城豈詔意哉承矩等
因共堅守旣而楊克讓率相州兵破賊圍遂解詔褒
之代歸爲淮南運副遷右補闕進運使淮河西三十
里山陽灣水勢湍悍運舟多覆詔維岳規度開故沙
河至淮陰磨盤口四十里北至淮滢凡五堰又創三
斗門於第三堰二門相距踰五十步覆以厦屋設懸
門積水俟潮平泄之建橫橋岸上築土累石以固其
址自是往來無滯按部泗州有囚死罪逮獄具母年
八十餘維岳哀而釋之坐贖金罷使職權知楚州遷

戶部員外郎度支判官轉郎中復爲兩浙轉運使歷
知懷滄二州真宗尹京召爲開封推官儲闡建兼左
諭德轉太常少卿及踐祚命權知開封拜給事中知
審官院以體肥艱於拜趨乞外授海州刺史移蘇臺
二州卒年七十六贈兵部侍郎錄孫世昌獻之並同
學究出身維岳明習吏事有治劇才王欽若始舉進
士預知其貴又善待陳彭年自刺郡連奏爲通判皆

稱薦之

宋史本傳

明劉逵家世忠孝性沉簡言語謹重洪武初薦入翰林

官刑部尚書

張日昇由舉人授陝西咸寧教諭敷教先躬率嘗修倉
食荒歲舍生陞孝義知縣取肺石梟雄戮辱之政旣
行宿稅無敢逋民愛之遂立祠焉尋擢知開州

張遇字逢道由進士知山西潞城縣政平刑簡邑獫狁
抵皆窮靡擢御史隸南京廣東道清山東軍振濯風
猷陞山西湖廣副使晉浙江按察使山東右布政尋
陟左持大體所至稱寬仁焉入爲順天尹遷刑部侍
郎改戶部致仕詔乘傳歸卒賜葬祭

任繼祖由進士除戶部主事遷員外郎性慧穎有明達
之識早卒人多惜之

婁志德由進士知直隸趙州赤心愛民而下從化聲譽甚著遷戶部員外督餉陝軍未嘗私羨餘擢杭州知府黎民乂安吏惴惴懼佚於法陞福建運使浙江叅政已又轉福建布政使晉南太僕卿改太常擢副都御史巡撫山東卒於官剔釐中外總若干歲冰蘖之操凜如一日所著如雨浙賦役成書卓有實濟長安語曰天下清官婁志德穆宗有詔褒美贈工部侍郎諡莊肅諭祭葬

閻廷梓號新泉由舉人授河津知縣有慈父母之稱歷濟南通判改知深州裁減燕賚禁絕伎樂革預藉以

寬民置長單以杜弊緝盜釐蠹築滹沱河堤修城塾
捐金賑飢建塾課士深人感之致仕歸尸祝名宦焉
趙宗昉字旭伯先世藝門人蓋有宋裔也七世祖以事
避項姓李父蘭亭博學有聲昉善讀父書弱冠食餼
試輒冠軍四方從遊者甚衆一日道拾遺金甚重遲
其主還之分半以謝笑弗受十八秋闈不售以恩貢
除成安知縣銳意興釐多善政調山東日照有大盜
黨與頗衆下車卽擒之一境肅清直指列薦剡偶以
事忤勢宦乃拂衣歸後復趙姓文章行誼表表可風
久而益著云

張承恩字君寵五歲而孤祖司徒遇撫之及司徒捐館
家道寢衰承母鄧訓勵志嗜學淹貫經史以祖廕入
太學仕江南濡須丞適牧闕攝州事期年多惠政士
民尸祝記諸石遷登州府通判清操尤勵吏畏民懷
致仕歸登人攀臥泣留如失慈父歸里後創建文昌
閣於黌學東南隅培邑文風復助建啟聖祠設義塚
四區推財好施濟人緩急逍遙林下詩酒自娛年七
十卒

王廷諫字信卿其先山東新城人也明弘治中遷於項
父三德恂恂有古君子風廷諫生而穎異年十三就

童子試卽冠多士補弟子員戊戌成進士授內黃知縣平明廉察聲名籍甚甫一載移調滑縣軍悍民刁至則興學校清軍餉詰隱刑暴吏不容奸人懷自勵政治肅然將超擢內用而性剛介恥事干求遂左遷留都外翰拂衣歸猶未及強仕杜門謝交遊布衣蔬食泊如也築雪蕉鏡中二園著有詩經四書捷解七子文華圖南草年八十一卒於家

李行志字仲升先世懷慶修武人明正德中始籍項城好讀書足不履戶外癸丑成進士歷任登萊兵備副使晉大叅所在有政績居鄉篤孝友敦齒讓恤窮賑

急獎進後學文章行誼卓冠一時註小學忠孝經女
誠尤精聲韻之學別著字音彙切韻發微等書行於
世

馬斯和字繼竹總角卽善屬文丙夜篝燈無間寒暑七
試棘闈未售以恩選入都當廷對時銓部奇其文戒
勿小就於是入北闈領薦旋成進士知文水縣以惠
民爲心修城垣減差徭興學校鋤強豪潔已愛民風
移俗易報績轉刑部主事歷員外多所平反三被恩
綸註公忠粹品醇亮端儒值畿南多事以憂國殞於
燕邸生平著作僅存來虹樓文集及清淨一得語兩

帙議者惜焉

衛道字以承磊落豪曠不屑俗務畢歲淹蹇小試操觚

家無與聯社者邑名碩馬繼竹名士多出其門欲從
遊修弟子禮馬以其狂也拒之既而竊覩其文擊節
許曰此逢年技也立當飛去果於癸卯甲辰聯捷成
進士歷中書舍人戶部員外郎中己酉分校北闈是
歲馬以恩選就試北雍榜發入彀適爲門下士仍并
讓左人以是服其器量越二載擢廣信知府鋤暴優
士嚴斥請託一郡頌廉明焉兩被恩綸秩滿陞鹽運
使解組歸年五十一無疾而逝

張宏志字狷小性穎慧篤孝友丁丑成進士出編修馬
世奇之門選直隸廣平知縣歲飢多盜建甌城蠲俸
賑恤民賴全活爲立生祠受事二載屢邀欽賞庚辰
調繁魏縣士民保留辛巳撫按交薦減俸行取擢刑
部主事壬午由本司郎中出知江南常州府至卽殲
天罡豪奴數輩一郡肅清有徐姓者罪宜絞以暮夜
金三千求脫不爲動卒正國法崇禎癸未卒於官

閻炤字德闡姿格清古學識淵邃處閎飄然有出塵
之志諳黃老諸書善吐納己酉舉於鄉筮仕鹿城軍
屯交錯治以廉靜民安事簡臥理有餘轉高郵知州

爲循良第一官舶往來接應甚繁乃解組歸里時明末歲荒盜起綸中道服與邑宰李元善指畫防守保障全城民賴安堵

馬文烜字振南少穎俊一覽無遺萬歷甲午舉於鄉乙未寇副車嗣是義命自安淡懷利祿遲暮勉仕河津恤行戶之苦減河灘之賦捐俸修橋省刑字下善政班班可紀顧骨鯁自持當事已心啣之已而逆璫募建生祠獨弗應愈撻讒搆一時士庶代爲上請諸憲白其誣温檄允留竟拂衣歸津人泣送攀轅不得行者竟日先是文烜禱雨立應津民立祠尸祝越三禱

復致大木二章爲其身後壽器餽粥僅足意豁如也
年七十有二卒於家

黃從德字伯明積學力行與仲弟從貴字涵初同以文
章名俱登天啟甲子賢書從德除山西絳縣知縣從
貴先一年知滿廣房縣兄弟踵徽後先若輝映焉山
西撫按嘉政績卓異交列薦章乃以病卒於官詩文
著作多不朽云

時語字含章有至性嗜學敦行明經謁選得山右介休
丞署篆武鄉黎城所至多善政減虛派革耗銀歲荒
捐俸煮糜全活甚衆撫按交薦擢華亭知縣以病歸

睦族恤鄰樂林泉者十餘載卒年七十八

閻坦字平之天姿穎異性孝友十歲失恃事父生員燿
及繼母色養無間弟垣方八歲殫心教訓萬歷戊午
以亞魁預計偕乙丑會副車遂淡志進取優游林泉
工風雅精岐黃著有羅經圖說陰虛燹理篇解竹逸
園諸咏癸未逆闖僞檄迫脅遠避淮上毀家繫子弗
顧乙酉旋里年九十餘終於家

國朝東存敬字心一其先東海蘭陵人漢太傅疏廣曾孫
孟達避莽難易今姓晉東晉爲著作郎居丹陽明初
一支遷項祖朝陽由明經授平陽學博敬少穎異弱

冠登萬歷戊午賢書遘疾不計偕者十餘年鍵戶攻
岐黃術曉暢宗旨暇則爲詩詞尤善鍾王體於人城
府不設藹如也明季避亂淮上順治乙酉旋里己丑
成進士選廣平司李至則清理案牘數年未結者旬
日結之蒞官四載寬猛得宜多所平反著有祥刑錄
一卷諸臺交薦擢吏部主事子七人皆入庠仲子紳
膺中翰選擢揚州同知清飈善政後先濟美

趙大生字子復少儻工詩古文詞草篆八分弱冠去
梓里遊歷四方

國朝定鼎經畧洪承疇委署滇省白鹽井提舉恤竈商禁

私販平市價政聲流聞陟瀛郡丞瀛介燕齊之區風俗獷悍萑苻時警擒撫有方鈴鐸不驚後攝津門叅議篆未幾告歸大學士馮溥知其才薦爲慶陽知府卒於官

沈邱縣人物

東漢戴憑字次仲平與人習京氏易年十六郡舉明經徵試博士拜郎中時詔公卿大會羣臣皆就席憑獨立光武問其意憑對曰博士說經皆不如臣而坐居臣上是臣不得就席帝卽召上殿令與諸儒難說憑多所解釋帝善之拜爲侍中數進見問得失帝謂憑

曰侍中當匡補國政勿有隱情憑對曰陛下嚴帝曰朕何用嚴憑曰伏見前太尉西曹掾蔣遵清亮忠孝學通古今陛下納膚受之訴遂致禁錮世臣是爲嚴帝怒曰汝南子欲復黨乎憑出自繫廷尉有詔勅出後復引見憑謝曰臣無謬諤之節而有狂瞽之言不能自尸伏諫偷生苟活誠慙聖朝帝卽勅尚書解遵禁錮拜憑虎賁中郎將呂侍中兼領之正旦朝賀百僚畢會帝令羣臣能說經者更相難詰義有不通輒奪其席呂益通者憑遂重坐五十餘席故京師爲之語曰解經不窮戴侍中在職十八年卒於官詔賜東

園梓器錢二十萬

後漢書
儒林傳

陳蕃字仲舉平輿人祖河東太守蕃年十五嘗閑處一

室而庭宇蕪穢父友同郡薛勤來候之謂蕃曰孺子

何不洒掃曰待賓客蕃曰大丈夫處世當掃除天下

安事一室乎勤知其有清世志甚奇之初仕郡舉孝

廉除郎中遭母憂棄官行喪服闋刺史周景辟別駕

從事曰諫爭不合投傳而去後公府辟舉方正皆不

就太尉李固表薦徵拜議郎再遷爲樂安太守時李

膺爲青州刺史名有威政屬城聞風皆自引去蕃獨

曰清績留郡人周璆高潔之士前後郡守招命莫肯

至唯蕃能致焉字而不名特爲置一榻去則縣之大
將軍梁冀威震天下時遣書詣蕃有所請託不得通
使者詐求謁蕃怒笞殺之坐左轉修武令稍遷拜尚
書時零陵桂陽山賊爲害公卿議遣討之又詔下州
郡一切皆得舉孝廉茂才蕃上疏駁之忤左右出爲
豫章太守遷大鴻臚會白馬令李雲抗疏諫桓帝怒
當伏重誅蕃上書救雲坐免歸田里復徵拜議郎數
日遷光祿勳時封賞踰制內寵猥盛蕃乃上疏諫帝
頗納其言延熹六年車駕幸廣城校獵蕃上疏諫不
納自蕃爲光祿勳與五官中郎將黃琬共典選舉不

偏權富而爲執家郎所譖訴坐免歸頃之徵爲尚書
僕射轉太中大夫八年代楊秉爲太尉蕃讓曰不愆
不忘率由舊章臣不如太常胡廣齊七政訓五典臣
不如議郎王暢聰明亮達文武兼姿臣不如弛刑徒
李膺帝不許中常侍蘇康管霸等復被任用遂排陷
忠良共相阿媚大司農劉祐廷尉馮緄河南尹李膺
皆曰忤旨爲之抵罪蕃因朝會固理膺等請加原宥
升之爵任言及反蕃辭懇切帝不聽因流涕而起
時小黃門趙津南陽大猾張汜等奉事中官秉執犯
法二郡太守劉瓚成瑨考案其罪雖經赦令而並竟

考殺之宦官怨志有司承旨遂奏瓚璿罪當棄市又
山陽太守翟超沒入中常侍侯覽財產東海相黃浮
誅殺下邳令徐宜超浮並坐髡鉗輸作左校蕃與司
徒劉矩司空劉茂共諫請瓚璿超浮等帝不悅有司
劾奏之矩茂不敢復言蕃乃獨上疏爭之帝得奏愈
怒竟無所納宦官由此疾蕃彌甚選舉奏議輒曰中
詔譏卻長吏曰下多至抵罪猶曰蕃名臣不敢加害
九年李膺等曰黨事下獄考實蕃因上疏極諫帝諱
其言切託曰蕃辟召非其人遂策免之永康元年帝
崩實后臨朝詔曰夫民生樹君使司牧之必須良佐

巨固王業前太尉陳蕃忠清直亮其巨蕃爲太傅錄

尚書事時新遭大喪國嗣未立諸尚書畏懼權官託

病不朝蕃巨書責之曰古人立節事亡如存今帝祚

未立政事日蹙諸君奈何委荼蓼之苦息偃在牀於

義不足焉得仁乎諸尚書惶怖皆起視事靈帝卽位

竇太后復優詔封蕃高陽侯食邑三百戶固讓章前

後上上竟不受封與后父大將軍竇武同心盡力徵

用名賢共參政事天下之士莫不延頸相望太平而

帝乳母趙嬈旦夕在太后側中常侍曹節王甫等與

共交構諂事太后太后信之數出詔命有所封拜及

其支類多行貪虐蓄常疾之志誅中官與竇武謀之
事泄曹節等矯詔殺武等蕃時年七十餘聞難作將
自屬諸生八十餘人並拔刃突入承明門攘臂呼曰
大將軍忠臣衛國黃門反逆何云竇氏不道邪王甫
時出與蕃相迓遂令收蕃蕃拔劍叱甫甫兵不敢近
乃益人圍之數十重遂執蕃送黃門北寺獄卽日害
之徙其家屬於比景宗族門生故吏皆斥免禁錮蕃
友人陳留朱震時爲銓令聞而棄官哭之收葬蕃尸
匿其子逸於甘陵界中事覺繫獄合門桎梏震受拷
掠誓死不言故逸得免後黃巾賊起大赦黨人乃追

還逸官至魯相

後漢書本傳

許劭字子將平輿人少峻名節好人倫多所賞識天下言拔士者咸稱許郭初爲郡功曹太守徐璆甚敬之府中聞子將爲吏莫不改操飾行同郡袁紹公族豪俠去濮陽令歸車徒甚盛將入郡界乃謝遣賓客曰吾輿服豈可使許子將見遂呂單車歸家劭常到潁川多長者之遊唯不候陳寔又陳蕃喪妻還葬鄉人畢至而劭獨不往或問其故劭曰太丘道廣廣則難周仲舉性峻峻則少通故不造也其多所裁量若此曹操徵時常卑辭厚禮求爲已目劭鄙其人而不肯

對操乃伺隙脅劭劭不得已曰君清平之姦賊亂世
之英雄操大悅而去劭從祖敬敬子訓訓子相並爲
三公相呂能諂事宦官故自致台司封侯數遣請劭
劭惡其薄行終不候之劭邑人李達壯直有高氣劭
初善之而後爲隙又與從兄靖不睦時議呂此少之
初劭與靖俱有高名好共覈論鄉黨人物每月輒更
其品題故汝南俗有月旦評焉司空楊彪辟舉方正
敦樸徵皆不就或勸劭仕對曰方今小人道長王室
將亂吾欲辟地淮海呂全老幼乃南到廣陵徐州刺
史陶謙禮之甚厚劭不自安告其徒曰陶恭祖外慕

聲名內非真正待吾雖厚其執必薄不如去之遂復
投揚州刺史劉繇於曲阿其後陶謙果捕諸寓士及
孫策平吳劭與繇南奔豫章而卒時年四十六兄虔

亦知名汝南人稱平輿淵有二龍焉

後漢書本傳

後漢許靖字文休平輿人少與從弟劭俱知名竝有人
倫臧否之稱而私情不協劭爲郡功曹排擯靖不得
齒敎以馬磨自給潁川劉翊爲汝南太守乃舉靖計
吏察孝廉除尚書郎典選舉靈帝崩董卓秉政以漢
賜周毖爲吏部尚書與靖共議謀進退天下之士沙
汰穢濁顯拔幽滯進用潁川荀爽及韓馥等爲公卿

牧守而遷靖巴郡太守不就補御史中丞馥等到官
各舉兵誅卓卓怒叱茲令出於外斬之靖從兄陳相
瑒又與仙合規靖懼誅奔仙仙卒依揚州刺史陳禕
禕死吳郡都尉許貢會稽太守王朗素與靖有舊故
往保焉靖收恤親里經紀振贍出於仁厚孫策東渡
江皆走交州以避其難靖身坐岸邊先載附從疎親
悉發乃從後去當時見者莫不歎息既至交趾太守
士燮厚加敬待陳國袁徽以寄萬交州徽與尚書令
荀彧書曰許文休英才偉士智略足以計事自流宕
已來與羣士相隨每有患急常先人後已與九族中

外同其饑寒其紀綱同類仁恕惻怛皆有效事不能
復一二陳之耳鉅鹿張翔銜王命使交部乘勢募靖
欲與誓要靖拒而不許靖與曹公書翔恨靖之不自
納搜索靖所寄書疏盡投之於水後劉璋遂使使招
靖靖來入蜀璋以靖爲巴郡廣漢太守南陽宋仲子
於荊州與蜀郡太守王商書曰文休倜儻瑰瑋有當
世之具足下當以爲指南建安十六年轉在蜀郡十
九年先主克蜀以靖爲左將軍長史先主爲漢中王
靖爲太傅及卽尊號策靖曰朕獲奉洪業君臨萬國
夙宵惶惶懼不能綏百姓不覩五品不遜汝作司徒

其敬敷五教在寬君其勗哉秉德無怠稱朕意焉靖
雖年逾七十愛樂人物誘納後進清談不倦丞相諸
葛亮皆爲之拜章武二年卒子欽先靖天沒欽子游

景耀

中爲尚書

三國志本傳

宋舒元

沈邱人少儻好學通左氏穀梁二傳辨捷強

記治

郡日或奏其不親獄訟事多寃滯不結宋太祖

面詰

問之凡所詰元必具誦欵向指述曲直太祖甚

嘉嘆

之子知白至作坊使知雄補殿直知崇安撫副

使知

白子明遠因對自陳任大理寺丞賜進士第至

太常博士

明劉東字汝蘭其先膠州人弘治間以商卜居沈流賊寇城東父釗倡勇率衆捍禦據守北城樓又嘗販麥遇寇劫投諸河漁人救歸置弗訟性好施貸者不責償犯者不較舉鄉飲賓年五十餘始生東穎敏過人齠歲通左國書一閱輒不忘年十一遊黌序十九食廩餼試輒高等庚辰以歲薦擢廷試第三鄉人勸之仕弗應閉門讀書不干預外事以子貴與父釗偕贈右叅政

童誠由歲薦任洛南主簿值黃龍洞中鑛賊變亂設防平息士民安堵爲立祠

楊鸞由歲薦任霑化知縣導以孝弟士民懷之力守清
慎勤譽望甚著未及報政而卒

張明體由歲薦任漳縣知縣操守清絜處置得宜士民
祠祀之

童原蘭篤學不倦諳練有爲辯靈濟廟飛詭糧石四百
德在鄉里同知盧知縣宗擊節歎賞曰范希文做秀
才便以天下爲己任因贈希范時英扁以表其能修
學宮勤勞獨多墻垣堅固至今無傾圮者仕終衛輝

司訓

劉漢儒字文卿嘉靖己未進士知滑縣廉介不阿臺省

土循良第一丁內艱服闋補濟縣遷兵部職方主事
二邑皆肖像祀之歷武選武庫諸曹侃侃持正不避
權貴轉山西副使有總兵郭虎失符驗委之于戶獄
成漢儒疑之白當道曰總兵例應親代郭虎不候代
而以勅印付千戶新帥至封筦如故罪不應坐千戶
而坐虎衆心允服課最轉上黨飭部伍精器械謹斥
堠廣儲蓄剪除強悍培植善類奉命閱邊馳驅數千
里指畫扼塞機宜著九邊圖說以進帝大悅璽書褒
嘉丁外艱服闋備兵雲中以互市功再蒙欽賞轉浙
江廉使晉右轄清理戎政晉左轄中丞張以減餉失

士卒心衆鼓噪擁之郊外碎其首潘臬皆避去儒挺
身當前開陳利害宥其脇從衆始帖然以同事引罪
調福建左轄沿海有倭警戶口播遷悉心經畫請旨
丈田嚴勵諸司按籍招撫民困得甦以疾歸再補滇
轄值緬酋亂經費不貲沐帥以勲戚乾沒爲害漢儒
清察本鎮無糧地畝勒令出租不增賦而用足帝甚
嘉之復以疾乞歸性廉潔不設城府宦橐圖書外無
長物居鄉恭謹遇大事一言立決毫髮不敢干以私
癸巳歷癸卯比歲不登舉廩餘周恤里人至今誦之
孫守巳以明經任滕縣主簿分署戚城時值屯田民貧

出私囊遍給牛種民倚賴之甫一載以母老致仕終
養家居濟人睦族有以橫逆加者閉門弗與較鄉黨
無不思其忠厚足勵澆風云

盧紹恩字嗣忠生而穎異以明經授休寧丞陸辭之日
具疏自陳曰貢士自作秀才時不曾俛首污稱今日
作承其何以對上官乎舉朝胥嘉之曰正直如君知
君不負丞矣帝允所請凡正途佐貳俱與正印官同
禮蒞任多異政終養回籍著有一得稿四書醒言勸
世編行條鞭議築河堤說行於世

盧文鴻字冲元萬曆癸巳選貢授洛川知縣調吳堡皆

有政績陞劍川知州以終養致仕沈大饑捐資施粥
全活甚衆

張接武字肖甫萬歷丁酉選貢任四川榮縣知縣山僻
斗邑政繁民猾武蒞任精明除害興利勸農課士剔
蠹除耗丁憂回籍遂優游林下以終

李如霖字媚澤天啟辛酉舉人署山西忻州學正分立
文社親加評定四方知名士負笈踵至四載兩膺正
薦陞陝西城固知縣流寇猖狂城固舊壕久不濬遂
成桑田有力者侵占幾半邑令議鑿輒阻於權貴霖
履任見有城無池簡志書舊額濶四丈五尺力請當

道疏通如舊城垣加高五尺計費二千餘金霖多方
設處三月報成士民始有固志老獍獍小紅郎一條
龍等賊突至攻圍數月不能克而去撫按前後交章
薦之崇禎十一年流賊合營犯漢中總制洪檄防昇
仙口距五十餘日斬賊百七十級奪回男婦五十二
口騾馬三十三匹加服俸二級歷任五載列薦劄者
七獎勵者五後因宦僕通賊捕殺之遂被中傷回籍
楊訓字佩弦淹貫羣書知名當世以崇禎癸酉歲薦任
彰德府學訓導爲人持重寡言笑足跡不入公府不
履市廛與兒謨閉門却掃相爲師友寒暑講誦不輟

教授生徒因才造就四方負笈者踵至戊戌進士劉祖向辛卯舉人孫馥咸出其門兄謨以恩選任合肥丞有惠政

國朝李煥字澹菴明末張獻忠陷潛山煥父孕嘉慷慨殉難煥以諸生匍匐叩閭疏三上得贈太僕少卿兵火之後家業蕭條事孀母先意承志喪葬盡禮嘗語子弟曰良家所事惟耕與讀耳專耕則俗專讀則窘乃嚴立課程教弟鼎玉子開第登進士仲子登第成孝廉煥以明經歷任睢鄧陝三學陞國子監學正所在有作人遺澤晚居林下敦宗族樂施予著有讀騷樓

詩稿李子語錄行於世

李鼎玉字水樵煥弟父歿難潛山扶柩還家艱苦備嘗
奮志讀書承母兄之訓連掇魏科以中書陞監察御
史凡有關國計民生者痛切言之置身家度外出爲
山東濟南提刑一塵不染有李青天之稱旋里有母
族王姓所售腴田六百畝悉取券焚之還給原主里
人咸服其義鼎玉曰吾非施義乃仰體母志耳事伯
兄煥雖年逾古稀猶朝夕省視不輟季弟佩玉悉所
成就孀母施苦節六十餘年奉養備極豐美嘗曰不
得爲良相猶願爲良醫因留心岐黃全活不可勝計

著有傷寒痘疹諸書繕刻成集

劉璞字石友學行純粹貢於咸均不樂仕進少孤足不履市閉門謝客圖書數卷而已事孀母以孝聞母病晝夜伏榻衣不解帶百餘日籲天以身代病良已撫其幼弟成立前明之季流氛猖熾所在摧陷城邑百姓塗炭璞椎牛享士日夕守陴城賴以全邑人至今德之好施予每臘底及二麥前輒發粟減價售貧乏者不取直歲以爲常設義塾延師課里中子弟咸令執學所成就不可勝紀精於醫理有求診視者無論雨雪必詣其家貧者卽裹藥與之所著有醫學集要

六卷行於世

孫馥字仙麴性孝友長

於著作明季盜賊竊發孤城如

累卵邑人束手無策

馥家無多儲散貲招募衆遂同

力卒以保全順治口

成進士觀政刑部未仕而卒